

KIKA KYAFWAINWA

KWIKALA KAFUNGA

... Amiwa nalanguluka mba, ke musango walepa-wabaya bingi musapwishi. Kabiji kwakubula kufunda ne, Na—Naketekela kechi Mbena kumvwanika bulongo saana nobe musapwishi ku bantu bamo ne. Kabiji Amiwa—Amiwa kechi netela nekwikala musapwishi ne, Amiwa njitu nobe tayala wasipeya. Bino Amiwa nkumvwa mba Njina Mbila kufuma kwi Lesa, amba mujishinda jami (ajo jojoka jishinda jo Nafwainwa Kwikipainamo), Amiwa mbena kweseka Kwikimweshwa ku ntanda. Kabiji inge kechi Nakonsha kwikala na yoya Mbila ne, Nakonsha kwikala ke wasatuka kwi Lesa kabiji ne kafutufutu kwi obewa. Muntu wakonsha kwamba kintu kimo ne kuketekela kintu kikwabo, ke bukaufutufutu. Atweba kimye kyonse twafwainwa kwamba bukine kufuma mu muchima wetu. Kya kuuba mba umvwe bantu bamona pe atweba, nangwatu bepachika ne atweba, tubena kukeba kwikala muntu wamushingi ne banabakazhi: kwamba kufuma panshi ya muchima wetu, akyo kyakiine mumichima yetu.

² Mwaka wapwa, nangwa mwaka wapwa kasa akyangye kufika, Najinga na jishuko ja kwamba pa—pa Mwinakilishitu... nangwa ndekelaiko mambo, mbila ya Kimishimishi, kuno ku Ramada. Kabiji Naketekela mba Naambile pa mutwe, kana kuno nangwa ku Phoenix, pa: *Kika Betelema Mucheche?* Kabiji Naketekela kyajinga muno, mwaka wapwa, Najikwambapo: *Atweba Twamona Kabaangabanga Nanji Ku Musela Kabiji Kyotwaishila Na Kumupopwela.*

³ Kabiji, mwayukatu, tutanga Baibolo, kabiji twakumya, amba “*Kika kyo?*” Kabiji bufuku buno Nalangulukile mba, inge mwakonsha kundekekako mambo pa kimye kicheche, kabiji ne kulomba pamo ne amiwa, Amiwa nkeseka kupana mbila yami ya Kimishimishi. Lesa yenka ye wayuka ako atweba kotukekala Kimishimishi kikwabo, inge kujipo Kimishimishi kikwabo panyuma yakiky. Nanchi byokiji mba abwe bwakonsha kwikala bu Kimishimishi bwapelako atweba kwikala pamo, poso twaikala ku tebulu mukwabo, kabiji kechi kikekala kimo kyamuyiwe musango ne, bino kikekala umvwe twaja ne kutoma Kijilo kipya pamo Nanji, mu Bufumu bwa Bataata ponka pa mpelo ya mukwakwa, kabiji lekai atweba twikisende bufuku buno nobe inge ino yombila ya Kimishimishi yapelako twaikala pamo, mu bukishika bwa panshi yamu michima yetu.

⁴ Nasaka kwamba bufuku buno pa mutwe wapusanako, bino

kimye kimo mukatana Lesa mu kintu kyenye. Aye uba bintu mujishinda japusanako. Kechi mujishinda jayukanyikwa ne, ke jishinda jabula kuyukanyikwa, bimye byabula kuyukanyikwa, bintu bibula kumweka, Aye kewabula kuyukanyikwa. Kabiji Nakeba kikye... Nkambo inge waswa, Nasaka kwamba pa mutwe wa: *Kika Kyafwainwa Kwikala Kafunga.*

⁵ Kabiji pano kasa tukyangye kufwenya ku Kyambo, akyo Naketekela mba awa ye Lesa, “Muntendekelo mwajinga Kyambo, kabiji ne kyokya Kyambo kyajinga na Lesa, kabiji ne kyokya Kyambo kyajinga Lesa. Kabiji ne kyookya Kyambo kya alukile ke muntu kabiji waikelenga muno mwetu.”

⁶ Nobe byonka byo Naambile, mulungu wapwa, nangwa mulungu wapwa kasa akyangye kufika ku Phoenix, “Kyashinikishiwa mba kuji mitwe ya bya panopantanda, bantu, babena kupita mu kino kishimikwa ponkapano.” Televizhonyi umweshwa kyokya. Kiji mu lubaji lukwabo, meso etu a kumubiji kabiji ne masesi etu faivi kechi akonsha kutola kyokyo ne. Kechi ke kufyatulwa kwa televizhonyi kiji kyonse ne, akyo kipishatu. Obewa kechi wakonsha kwenda na munwe obe ne, kechi wakonsha kupuma jiso jobe ne, bino kibena kushinikishiwa mba kyafyatulwa myaka ne myaka. Nakonsha kwimana... Nangwa muntu mu Australia, wakonsha kwikala na—na televizhonyi sikilini kuno, kechi kyonka kyotu ne bino aye—aye mwanamulume wakonsheshe kwamba, waendesha munwe wanyi, wakonsha kupuma jiso janji, nangwatu musombelo wakivwalo kyoavwala, wakonsha kwikileta ponkapano pakibumba; kabiji aye uji mu Africa, Australia, kuzhokoloko ntanda. Mwamona, akwa kuji kizhingu kyabushayuka bwabintu bijiko. Amiwa kechi nakonsha kulondolola ne, bino Nayuka mba kiji konka. Amiwa kechi nalanguluka mba muntu uji yense wakonsha kwikilondolola ne. Nanchi, televizhonyi yakonsha kwikoka ne kwilenga kyaikala kintutulu nabing’ambanga’amba, amba bakonsha kwikileta pakibumba.

⁷ Pano, akyo kintu kimo kyajingapo kimye Adama kyo ajinga kuno. Televizhonyi wajinga pano kimye—kimye Elaija kyo ajinga pa Mutumba wa Kamela. Kyajinga pano kimye Martin Luther, awa pulisiti mwanyike, wataile kijilo panshi ne kwamba mba, “Ke kosher! Kabiji baoloka bakekela ku lwitabilo.” Kyajinga muno pa kyokya kimye, bino twenakwikitanatu pa kino kimye. Kabiji byokiji ne akyo, amba mu kyeenyi kyetu bufuku buno ye Lesa, Bamalaika, bilengwa byakumupashi abyo bibula kumweka kumeso abumuntu bwetu. Bino juba jimo kikekala kintutulu nobe byonka biji mu televizhonyi pano, kabiji nobe kokiji. Pano, oene mambo o Naketekela Kyambo.

⁸ Yesu waambile mba, “Yense ukanungako kyambo kimo ku yiwe Baibolo, nangwa kufumyako Kyambo kimo ku Kikye, lubaji lwanji lukafumishiwamo mu Buuku wa Bumi.”

⁹ Nanchi, twayai tukunyiike mitwe yetu, kasa tukyangye Kwikitanga. Kyazhijikwa bingi! Muntu uji yense uji nangovu wakonsha kuzhikula paji, bino Lesa yenka wakonsha kusolola Kyokyo.

¹⁰ Kabiji na mitwe yetu ya kunama panshi konka kotwafumine, kabiji juba jimo tukabwela, Nakumya . . . Kabiji mu kino kimye kyazhijikwa, byo tubena kufwenya kwipi ku Kimishimishi, inge kujipo bamo muno abo kiine babula kuvwa bulongo kabiji mwakonsha kukeba nobe kwimuvulukako mumilombelo, mwakonsha (kwakubula kusuntula mutwe wenu) suntulaikotu maboko kwi Lesa ne kwamba mba, “Mvulukaiko amiwa, Nkambo, akye Kimishimishi”? Lesa emupeshe.

¹¹ Wakila Mukuzhila kabiji Taata Wa Mwiulu, Lesa Wabulume bonse, awa wajinga kufumatu kuntendekelo, kasa kukyangye kwikala kabangabanga, nangwa ka atomu, nangwa ka molekyu. Anweba mwalegele bintu byonse mwi Yesu Kilishitu Mwaana Wenu, kabiji ne kwitupa bintu byonse byatutu mwi Aye. Twimusachila Anweba, bufuku buno, Nkambo, pa jije jishuko Anweba jo mwapana kwi atweba mukupwila pamo, kujimunwa ne kufunjishiwa ku Mupashi Wazhila. Kabiji Mupashi Wazhila usenda Byambo Byenu ne kwi Bisolola kwi atweba, mambo Yesu waambile mba, “Umwwe Aye Mupashi wa Bukine waiya, Aye ukemuvulula pa bibye bintu byo Naamba kabiji ne kwimumweshwa bintu bikeya.”

¹² Lesa, kechi kujipo umo mukachi ketu ne, kabiji kechi mujipo nangwa umo panopantanda ne, ing’anyi wafikilamo kweseka kulumbulula Kyambo Kyenu, mambo kyanembwa mba, “Akyo Kyambo kya Lesa kechi kiji nandondolwelo yafyamika ne.” Onkao mambo, Nkambo, twalomba mba Mupashi Wazhila usa kwitupa bufuku buno, kila umo ne umo, ekale na kibese akyo atweba kyotubena kukeba kyakutondwa ne kupwisha nzala ya mumuchima mambo twafwenya kwipi ne Anweba. Atweba kechi twafikilamone, babula kutoka, babulakufwenya pepi ne. Lekai Mwaana wasemekelwe mu Betelema, ao waikela bumi bwakila kulumbuluka, kabiji ye yenka muntu walumbuluka panopantanda, kabiji Ayemwine wipaine ke mulambo amba Aye akonshe kwituwamisha ne kwitovwa atweba bandengamambo babulakutoka kabiji ne kwituleta atweba mubulunda pamo ne Tata, swishai bufuku buno amba Mupashi Wazhila (kupichila mu kusapwila kwa Kyambo) usa kwitubila kyokyo atweba.

¹³ Nkambo Lesa, kuji bavula bakolwa muntanda leelo, kumeso a michi yakila mukuwamisha ayo yapanwa kwi atweba, kabiji ne michi yawamisha ne bipatela byawamisha. Kabiji pano mubyonsebye byabushayuka byasayasi byatulukiwa, pano bino bakolwa bakivujilakotu kukikala ne byobayuka muntanda, mambo kuji bundengamambo bwavula ne kubula kwitabila kwavula kukila ntanda byoyayukile. Tukwashai bufuku buno,

Dokotala Mukatampe, kabiji ne kubuka bakolwa baji mukachi ketu.

¹⁴ Kabiji tupai Mupashi, Mupashi wakiine wa Kimishimishi. Kimye leelo apo panji kusangalala kwamuntanda, kichi kya Kimishimishi pokipopwela, ne mashimikila akwa—akwa muntu watelwa najizhina amba Santa Claus, kabiji ne Lusanguko lwetu lwa tululu, kabiji nebyapusana pusana byamafashoni byavula byapanda byakwachiwa kala, lekai abye bikale pambaji, Lesa. Twayai tuye mwi Kilishitu Kyambo, mambo twikipuzha mu Jizhina Janji kabiji ne ku lukumo Lwanji. Amena.

¹⁵ Inge mwakonsha kuzhikula pamo ne amiwa pa kutanga mu Byanembwa, Luka Wazhila, kyapitala kyabu 2. Mwakonsha nkung'umvwa bulongo?

Bushe kujipo kubula kwikala bulongo kwamaikolofoni nyi? Kana anweba mujikunyuma mubena kung'uvwa bulongo nyi? Inge mwakonsha, suntulaiko maboko. Nemusanchila. Kyapitala kyabu 2 kya Mamboawama mwaila Luka Wazhila.

Kabiji mu oa moba, akwa kwafumeneko kwajinga mukambizho kwa Kesala Augusatusa, amba bantu bonse bamuntanda bafwainwa kulemba.

(Kabiji kuno kunembwa kwajinga kuntanshi kwalengelwe kwayukanikwa...byoajinga mwine ndamakyalo wa Silya.)

Kabiji bonse bayile na kwinembesha, au kokwa ku muzhi wangi monka mwanji mukyalo.

Kabiji Yosefwa naye waile kufuma ku Galileya, monka mu muzhi wa ku Nazala, mu Yudeya, . . . muzhi wakwa Davida, akyo kitelwa mba Betelema; (mambo wajinga wa mu nzubo ne kisemi kya kwa Davida.)

Wayile na kwinembesha aye mwine Maliya pamo awa ye a ipangwizhe, kasa kiji kikantampe na mwaana.

Kabiji nanchi kyajinga, mba, kimye aye kyo ajinga kokwa, moba anji a kusema kyakuuba mba akapokolwelwe.

Kabiji wasemene mwananji mutanshi wa mulume, ne kumupombwa mu byakumvwala bya munda, ne kumubika aye monka mukijilamo banyama; mambo mu nzubo yabenyi kech mwajinga mwalufikila ne.

Kabiji akwa kwajinga monka mukyalo kimo ba kafunga mikooko mu yoya ndanda, baikajile bufuku na kulama jitanga jabo.

Kabiji, aye, malaika wa Nkambo waishile pe abo, kabiji lukumo lwa Nkambo lwibasamiine kuzhokolpka konse konse pe abo: kabiji abo bajinga namoyo mukantampe.

Kabiji malaika wibakumbwile mba, Kuchina ne: mambo, talai, Amiwa nemuletela...lusekelo lukatampe lwa kusangalala, luji ku bantu bonse.

Mambo kwi anweba jaleelo kwimusemenwa mu uno muzhi wa Davida Mupulushi, ao ye Kilishitu Nkambo.

Kabiji ne kano ko kayukilo kenu; anweba mukataana mwaana wapombwa mu bisapi byabanyama, kasa alaala monka mukijilamo banyama.

Kabiji ponkapotu kwamwekele kyajinga ku...Kabiji ponkapotu akwa...ne malaika jibumba ja...mazhita a mwiulu kasa abena kutota Lesa, kabiji ne kwamba mba,

Lukumo lwikale kwi Lesa mwiulu mwine, kabiji pantanda mutende, buwame bwikale ku bantu baya mungi.

Kabiji kyaishile kufikizhiwa kuuba mba, byonka bamalaika byo bafumine mwiulu, bakafunga byo baambile umo ne muwabo, Twayai tuye pano ne ku Betelema, kabiji tumone kiky kintu kyaiya kufikizhiwa, akyo Nkambo kyo etuyukisha atweba.

Kabiji abo pakuya na kusondomoka, lubilo bataine ba Maliya, ne Yosefwa, kabiji ne mwaana kasa alaala mu akya kijilamo banyama.

Kabiji kimye abo kyobamumwene, ba ambile mba mambo auno mukukumbanya kwa sawakya abo kutazha ku mwaana.

Kabiji bonse baumwine bakuminye pa byobya bintu byobabujilwe kwi abo ku bakafunga.

Bino Maliya wibilamine byonse byambo, kasa ebilanguluka mu muchima wangi.

Kabiji bakafunga babwelele, na kutumbijika ne kutakaika Lesa mambo abintu byonse abyo abo bauwine ne kumona, monka mo bebabujile abyo.

Aye Nkambo a bikepo mapesho Anji pakutanga kwa Kyambo Kyanji.

¹⁶ Pano, ke...Kika akye kintu kikatampe kyo kyasolwejlilwe ku bakafunga? Akyo ke kintu kyakukumisha atweba muyewa musango. Amiwa njina Binembelo bimo bya nembwa papo, kabiji byanembwa bicheche byo Nakonsha kweseka kupitapo, mu kulumbulula kwi anweba *kika* mwaila buyuke bwa maana ami. Kabiji kapepo panyuma ya kiky, amba Nkambo uji na lusa Lwanji, bufuku buno, usakufumyako kintu *kika* kwi atweba. Bino bushe...Atweba bavula, Naketekela, pa kimye kimo nangwa kikwabo, twakumya kika akye kintu kikantampe kyamwekele mubimye byonse kyakijinga kyasololwa ku bakafunga. Kika kyo Kyasolwejlilwe kwikala bakafunga kechi

ku bafunda masukuulu amambo awama a joja juba ne? Bajinga umo wafunjishiwa kwi Kyumvwa. Kabiji kika Kyokya ishijile ne kupitaila banonka, kabiji ne kwiya kubakamulanda? Neapo, kika Kyokya pitaijile bafunda ne bamaana, kabiji ne kwiya ku bekepesha ne babula kufunda? Kuji mepuzho acheche anji *kika* mu kiky.

¹⁷ Kabiji ene mambo o Nakonsha kwambila mba, monai, mwaana wasemekelwe mu Betelema. Akyo Betelema mu kulumbulula kwa Kihebelu, nobe byonka byo twajinga na myaka yavula yapita kunyuma, *Betelema* kyalumbulula mba “nzubo yakwa Lesa yashinkwa.” Kabiji twashinikishe mu Binembelo, Aye kechi waishile pantu pakwabo ne. Betelema wajinga waikajikwa pe Rahaba ne aye—aye mwata wanji. Rahaba wajinga inaja bapite amba bonsettu babajilwa jimo, kufuma ku—ku nzhita ya Isalela, panyuma yakushinda Yeliko. Kabiji ko kulwitabilo ko aketekejile Mbila ya Lesa, mu musango wanji, kabiji aye wapulukile. Kabiji kufuma popa, kimye Yoshua kyo aabenye ntanda amo muntu yense mo afwainwa kwikela, . . .

¹⁸ Kabiji kuji lufunjisho lukantampe bingi alo lo Naketekela mba nakonsha kuleta ku Tucson, lwa boba bamaana bakina Hebelu basemene baana babacheche. Kimye aye abinzhilenga pa misongo yakusemwa kwa mwaana, watelele jizhina ja mwaana kabiji akya kibika mu ntanda ya mulaye, ke mukoka. Akya kintu kikantampe, kyonse Kyambo kya Lesa kyasonkakana bulongo ponka pamo. Inge kechi kyasonkakana pamo ne, kechi Kyambo kya Lesa akyo ne ke mizhilulwila, ke ndangulukilo yebena kuzhilulula akya Kyambo. Ke kusunkakana byonsetu pamo.

¹⁹ Nanchi, pano, Aye wajinga Shinkwa wa Bumi, nobe byo twafunjishe mulungu wapwa mu Phoenix, nangwa mulungu wapwa kasa akyangye kufika ne. Kabiji byo ajinga Shinkwa wa Bumi, Aye kechi wakonsheshe kwiya pa kifulo kikwabo ne kanatu “*nzubo ya Lesa ya shinkwa.*” Kabiji akya akyo kyajinga *kika*. Pano, papo, Yesu wasemekelwe mu Betelema, kabiji mu Betelema kwajinga shinangonga, bantangi bakatampe babupopweshi baikelenga mu Betelema. Davida aye mfumu-kafunga mukatampe wasemekelwe mu Betelema, bashanji Yese basemekelwe mu Betelema, aye bankambo yanji ba Obed basemekelwe monka mu Betelema. Neapo, kyonsetu kyakunyuma, kyafumine mu Betelema.

²⁰ Kabiji papo, Yesu Mwaana wakwa Davida wasemekwa mu Betelema, monka mu bimvule bikantampe bya kafindulo. Nanchi inge abo bantu bafunjishiwa, kabiji babena kupembelela Mesiyasa pa yonse ye myaka; myaka foolo sauzande, Mesiyasa wa awilwe kwiya. Kabiji umvwe Mesiyasa wasemwa mu kimvule kya kafindulo, kika kyo bajinga nakyo kubwelatu mu mitumba na jibumba ja babula kufunda, bakafunga babula kufunjishiwa mu kuleta Mbila ikatampe, Mbila itanshi? Kabiji babikileko bakafunga! Kechi bamaana ne bafunjishiwa ne, bino bakafunga.

Ke kintu kyenyi, kechi ibyo nenyi? Bino kwafwainwa kwikala *kika* kuntu kumo . . . Kuji akya *kika*, pano kwafwainwa kwikala mukumbu kika! Kabiji kafwako muntu wayuka mukumbu ne kanatu Lesa. Aye Iye wayuka mukumbu.

²¹ Pano, vulukai, Mesiyasa wajinga kala aye mumuzhi, wasemekelwa monka mumuzhi, monka mwaikajikwa; monka mumakafindulo akatampe mwajinga mapulisiti akatampe, kabiji mapulisiti akatampe, kabiji ne bafunda mambo awama, kabiji ne bamaana, kabiji ne bafujishiwa, bonsetu bajinga konka mukupembelela aye Mesiyasa. Kabiji akwa iko Aye koajinga, monka mukachi kabo! Bino kika abo kyabaijile ku . . . monka mumitumba ya mu Yudeya mu babula kufunda, babula kufujishiwa, babula kuyuka kisho, bonka bene bakamulanda? Kyamweka nobe muntu wakila mukubula kusunakana muyewa mwingilo, mu kusolola Mbila ne kwibatuma mba basende Mbila.

²² Mwayuka mwaila milanguluko yami? Kechi kyakonsha kuyila maali avula ne, bino Amiwa nakeba kupana milanguluko yami: Naketekela mba ke mambo a maana akwa Lesa, Aye wayukile mba kechi bakonsha kutambula Mbila ya musango yewa mo Aishijile ne. Kechi kyajinga mwaila kufunda kwabo ne. Kyajinga kyapusanako. Kechi kyajinga kya bafunjishiwa kuketekela mba Aye ujitu pamo ne. Kyajinga kyapusanako na ng'umvino yabo ya masukuulu a mamboawama. Byonsetu byakufujishiwa kwabo, byonsetu byamafunjisho abo akipitaijile, kyaikela kyabula kintu. Naketekela kyajinga maana a Lesa ao wayukile mba kechi bakonsha kutambula Mbila ya musango yewa ne.

²³ Nanchi Mesiyasa wajinga muno, kabiji kwafwainwa kwikala muntu umo Wikipyuka. Kabiji Aye wayukile abo babujile kwikajikwa amwamonka mukipe kyanji. Aye wakonshe kuyuka byavula byaletelwa kwi Aye mwaila mbila ku jibumba jababula kufunda, kukila abyo Aye byoafwainwa kwikala ku jibumba ja bantu bamvwanga-kana abo baikela mu mashinda abo kyakuuba mba kechi wakonsha kwibalulula ne, nangwatu Kyambo kya Lesa ne.

²⁴ Kabiji pano, mulunda Mwinakilishitu, lekai ngipuzhe jije jipuzho, na bukishika bonse ne butemwe. Amiwa nakumya kana Wakonsha kuuba ngubilo imo bufuku buno, kabiji ne kwitutuma atweba mu kino kisemi akya Kyambo kyalailwe kulaiwiwa mu kino kisemi, Nakumya inge abo bamaana bamambo awama betu, kabiji ne bafunda, kabiji ne bamaana, kechi bakonsha kwalulula aye Mbila musango umo byonka byobaubile abo? Muntu kechi upimpula ne, nangwa Kyambo kya Lesa kechi upimpula ne. Aye ye Lesa ubula kwaluka, Aye kechi upimpula ne!

²⁵ Monai, Bamalaika kasa beya na . . . Bamalaika kasa babena kwiya na kupana Mbila yabo ku muntu uji byobya mu kipimo kya panshi, kimye akwa kwajinga bantu bayuka bintu

(bamilanguluko ya pantanda) bafikilamo kukila bakamulanda, bakafunga babula kufunda ne. Kafunga wajinga wabula kufunda bingi ku muntu uji yense, aye kechi wakebelenga kuyuka kintu nangwa kimo ne kanatu na mikoko yanji. Aye kechi wakebelenga kuyuka samushi ne. Aye kechi wakelebelenga kuyuka musango mwa—mwa kwabenya awa atomu ne. Aye kechi wakebelenga kufunda ne. Aye wayukiletu mikoko yanji, kyo kyonka kyo akebelenga kuyuka. Kabiji Lesa, mwine mukantape Wamaana, kabiji Nsulo ne ntatwilo ya onse maana, wakonsha kusala musango wayewa muntu amba (bantu, kyailinga, nobe aba), kabiji ne kupitaila bonsetu bawama-bafujishiwa bulongo kumasukulu amba bafujishiwa ne kwibiyuka Abyo. Waamba kintu kimo, amba bafunjishiwa mu mwingilo ungi watama. Kupitaila bonsetu banema bingi muntanda; kwajinga bantu banema bingi, bafujishi bakantampe, Kefasa pulisitu mukantampe, bavula bantu bakwabo bakatampe, bonse bafunda bena Isalela, madinominesheni onse, kabiji ne bonse bafunda masukuulu a mamboawama, Lesa wapitaijile byonsetu bye! Pano, awo ke maana akwa Lesa.

²⁶ Monai, Meulu Alepesha akatampe kasa abena kupana munema pantanda kuboba bekepesha bingi kabiji ne babula kufunda. Akwa Kulepesha kwa Meulu kwaishile kulenga Ayemwine kuyukanyikwa panshipene ponka pano pantanda, kupitaila byonsetu pakachi byakulenga Ayemwine kuyukanikwa ku bantu babula kintu ne; kwiya ne kupana Mbila ikantampe kubantu babula kintu mu bime byonsetu. Kwajinga baluwe bavula bingi bakantampe. Twakonsha kulanguluka mu juba jakwa Nowa, ne bangauzhi, kabiji—kabiji ne bang'anga bakatampe, ne bakwabotu, bajinga mu moba apita. Awa muntu mukatampe wafunda, mamfumu, bamandabyalo, bamamfumu, bino kuno Aye koaletele Mbila ikatampe yonsetu. Kika kyajinga yoya Mbila? “Mesiya uji muno pakino kimye!” Mwamona? Kabiji mukulenga amba kiyukanikwe, Aye wapitaijile bonse bafujishiwa, mu kulengela kuyukanikwa kubakafunga bekepesha.

²⁷ Kilangulukaipo: bonse basapwishi, bonse bantu ba kipwilo, bonse bafunjishi, bonse ba—bafunda masukuulu a mamboawama, mali onse atainwe, bipwilo byonse, bino mafunjisho, ne madinominesheni, byonse byapitaijile! Onse mafunjisho oba jinga nabo mubyonsetu ba—ba mishonali bonsetu, kabiji ne byonsetu byafwainwa kwikala, bamembala bonse, kabiji ne bintu byonse byo balangulukilenga mba baji na munema kwi Lesa, pano aya Mbila yakiine yonsetu ibapichile kufuma kubonsetu. Kyenyi! Kika? Mwaamona?

²⁸ Kabij monai, kechi kyokyonkatu ne, bino ke kintu kabulwa kutemwa mukino kifulo namambo akyokya kintu. Abo bakafunga, pano, ibo batambwile ayo Mbila. Kabiji pano monai akwa kwajinga Mbila: amwa mwafwainyijile kubiwa

monka mukyakubulwa kuketekela amba Akya kyaishile. Kabiji Nakumya, bufuku buno, inge tubena kupembelela Mbila ya kine ya kwa Nkambo Yesu, Amiwa nakumya inge Akya kyakonsha kubiwa mujoja jibumba jabulwa kubiwa, akya kifulo kyajinga...akya kikatampe, kyakila mukufujishiwa mwaila byakisho byantanda ne kipwilo leelo jino akyo kyanalanguka amba kyajinga jibumba ja—ja, oo, kyaikajikwa? Nakumya kana kechi kyakuuba mba kana kwepi ko twakonsha kumutana Aye? Akya kifulo kyabula kulumbuka, kabiji ke kubang'ambi abo babula kufikilamo. Bakafunga kechi bayukilepo byakwamba ne, kanatu kufunga mikoko; kyawama, kampe amba kika Akya kyokyaishijile.

²⁹ Bino pajinga Kyambo kyalailwe. Monai, kyakonsha kuuba jibiji.

³⁰ Kyapitaijile byonse byafikilamo muntanda. Kyapitaijile byonse byafikilamo, kabiji kyasolokele kubantu babula kufikilamo. Bonse bafikilamo bajinga nabyakufunda bya—bya budokotala bikantampe byabulesa ne—ne byakufunda maana, kabiji—kabiji ne byakufunda byapalepa, kabiji ne bikantampe bya makafindulo ne bintu bikwabotu, byonsetu byapitaijile ne kusololwa kuba bulakulumbuluka. Maana, ayo maana abula kupela akwa Lesa Wabulume bonse o ekyubile, mukwiballengela amba aya Mbila ikatampe iyukanyikwe kwabo, “Aye Mesiyasa uji pano pantanda.” Ng’anyi maana! Kyakonshatu kufuma kwi Lesa ao wayuka maana! Maana onse ne masukulu onse, kabiji ne byonsetu, byajinga pano byapwa kinto ne kwibipitaila kupichila maana akwa Lesa akatampe. Amiwa natwajijila nakubwezhapo jikwabo mambo Amiwa natemwa amba kiye monka mukuzhika saana. Byonsetu byaikele byabula kintu, kechi byajinga na buwama ne. Byapitaijile byonsetu mukulekatu kana onka maana akwa Lesa alumbuluka angijile mujoja jishinda, amba Lesa wakonsha kutola kintu kyalengululwa ke kyafikilamo.

³¹ Twakonsha kwimana papo ne kwamba pe Yoano. Twakonsha kwimana ne kwamba pe Elaija. Kafwako nangwa umo wayuka kwafuma Elaija ne. Byonse byo bayuka, aye wamwekeletu pa kyokya kifulo. Bangauzhi kunyuma mu mankulo, bajinga babula kintu ne. Bino Lesa watolele kyokyo kuuba...kabiji ne kupitaila aa—aa buyuke bwa kipwilo, ne kufunjisha, pakuuba mba...amweshe mba Aye ye Lesa. Aye watolele akya kyabula kintu, mukwingila kintu kimo. Aye umweshwa maana Anji ne Bulesa Bwanji kupichila mu kuuba byobya, amba Aye utola kintu kyabula nangwa kimo ne. Kimye kitanshi Aye kyo alengele muntu, Aye watoleletu mulumba wa buchimba kabiji ne kulengamo muntu. Kechi kyajingapo kintune kana buchimba, bino Aye walengele muntu. Kabiji Lesa pano utola kintu kyabula nangwa kimo ne, pakuuba mba obe kintu kimo. Kabiji kikulu twalanguka mba atweba twi kintu kimo, nanchi kechi twakonsha kwingijishiwa mu kuboko

kwa Lesa ne. Twafwainwa kuleka byonse byo twayukile nangwa kufunda. [Mulongo Branham wawamisha pashingo yanji—Waku.] (Ndekelaiko mambo.) Nobe Paulo Wazhila mukatampe, aye waambile mba walubako bintu byonse byo afunjile, pakuuba mba ayuke Kilishitu.

³² Masukulu abo onsetu, mafunjisho abo onsetu ne bikwabotu, byaingijilenga kubula kintu ne kwi abo. Kyapelako kyamukaine Aye! Aa onka masukulu obajinga nao ajinga ajinga konka *kwi* Aye, mukumuketekela Aye, waalulukile ne kwikala ke mulwanyi Wanji nalupata bingi, ne kumupopa Aye!

³³ Bushe mwayuka mba jishimikila japita jibwelapo jikwabo nyi? Ke kintu kyayukanikwa. Kyakonsha kumwekaninyika jikwabo ponkapano kulubaji lwetu. “Oo,” mwaamba mba, “Inge Naikala na bumi nanchi, . . .” Kyawama, pano, inge mubena kukeba kuyuka byo mwaingila kyokya kimye, talai pa musango yemujimo pano; kabiji mwakonsha kumona abyo byomwauba anweba nanchi, mambo kekiine kyasololwa.

³⁴ Wafunjishiwe kuketekela Kyambo Kyanji, kabiji pano Kyambo Kyanji kyashinikishiwa kumeso abo, abo bakaine Kyambo akyo kya shiniikishiwa. Inge Lesa washiniikishe byo Aye byoafwainwa kuuba, kabiji waambile Aye byo akooba, kabiji washinikishe bintu Aye byo akooba, nanchi ba alulukile ne kwita yiwe muntu amba “mupashi watama” (ao wibafinga bonse). Langulukai kyamwekele! Langulukai kibamwekejile; byalufujisho lwabo bibalengejile kubula kutuluka akya kyonka Kyambo kyaalukile ke muntu mu moba abo; aa onka mafunjisho abo obajinga nao aku masukulu, na bafunjishi babo bawama bingi.

³⁵ Kabiji mwaamba mba, “Kyawama, atweba kechi twakonsha kuuba kyokyo leelo ne.” Bafunjishi babo baji bingi kwalepa mwaila kuyuka bintu nobe leelo (bayukisha, nangwatu, kubafunjishi betu), kabiji bakankelwe. Abo kechi bajinga na naini aduleendi naite-sikisi kabungwe nobe byonka byo tuji leelo ne. Bajinga na basatu. Kabiji mwaila fiili, kuyatu panshi mu fiili, kabiji kafwako nangwa umo mubabo fiili bakonsheshe Kwikitulaka ne! Kimweshatu mba muntu byo auba ke bumbulwa maana kwi Lesa. Mwamona?

³⁶ Pano, abo bakakelwe kwi Kiyuka. Pano . . . Kabiji bakoba kintu kimo ne jikwabo.

³⁷ Muntu . . . Milanguluko yawama, kimye kyonse kyawama. Kabiji muntu kechi ukingya kifulo kyanji ne, aye kechi upipula mashinda anji ne; Amiwa mbena kwamba pa muntu wa muntanda. Muntu kimye kyonse utakaika Lesa, muntu wabumpopweshi, pa byo Auba, kabiji kimye kyonse utongola bantu ku byo Akooba, kabiji ne kusula byo Abena kuuba! Mwamona? Awa ke muntutu, aye walengwa muyewa musango, aye kimye kyonse wikalatu muyewa musango. Kabiji anweba

mutanga Baibolo bufuku buno mwayuka mba akyo kiji monka mwaila Kyambo, “ibyo.” Kimye kyonse utakaika Lesa pa kyo Auba, ne kwamba byo Akoba, kabiji kasa alubako byo abena kuuba. Akya ke kyubilotu kya muntu.

³⁸ Ene mambo kyo baubila kikye, bafunjishi, mwaila milanguluko yami: abo balumbulwile Kyambo, mambo bonse baketekejile mba Mesiyasa ubena kwiya. Bonse bena Isalela baketekejile kyokyo, abo kechi bekyubilepo leelo ne. Bino kiine kintu kibalengejile kubula kumutuluka *Aye*, *Aye* Mbila yanji kechi yajinga namwaila mafunjisho abo ne. Abo... ndumbulwilo yabo amba bajinga na Kyambo, aye Mesiyasa kechi wisolwele *Aye* mwine mujishinda jo bamwesheshemo amba Ukekyuba ne. Nanchi, onkao mambo, abo kechi bamuyukile *Aye* ne mambo kechi Kyafikijilemo kulumbulula kwabo ne. Nobe byonka byo Naamba kunyuma, ne kwamba jibiji mba, “Lesa kechi ukeba muntu kulumbulula Kyambo Kyanji ne. *Aye* ye *Iye* Mwine ulumbulula.”

³⁹ Pano, Baibolo waamba mba... Lekai shinikishe kwi anweba amba amba abwe bo Bukine. Isaya ngauzhi, myaka sebeni aduleedi fifitiini kikye kasa kikyanyge kumweka, Isaya ngauzhi waambile mba, “*Aye* kisungu ukemita jiimi, ne kusema mwaana.” Kechi kujipo luzhinauko ne amba muntu yense uji muyoya nkulo walangulukile mba mwananji wamukazhi ukekala yewa mwanamukazhi, mambo Isaya wikyambile. Bino, mwamona, kyajinga myaka sebeni aduleedi kulutwe. Bino kimye... Lesa kechi wakebelenga muntu kulumbulula Kyambo Kyanji ne, inge *Aye* wikyuba, nangwa *Aye* wakonsha kwikyuba. *Aye* waambile mba Ukekyuba, kabiji *Aye* wikyubile!

⁴⁰ Lesa walaile mba *Aye*, monka mu Isaya, ne akyo, Naketekela kyapitala kyabu 28, pepi nobe veeleshi wabu 18, kabiji ne mu Yowela 2:28, amba mu moba akapelako, myaka masauzande abiji apelako, *Aye* uketulwila Mupashi Wanji pa bantu bonse. *Aye* waambile mba, “Baana benu babalume ne babakazhi bakaulanga. Bansongwalume benu bakamonga bimwesho. Bakote benu bakalotanga bilotoi.” Kabiji ne bintu abyoye *Aye* byoakoba, Isaya waambile mba, “Na kikukuma ne na njimi ingi ayo Amiwa yonkamba nayo ku baabo bantu, kabiji akwe ko Kukokoloka.” Bino abo kechi bakonsheshe kwikyuvwa Akyo ne. Bapukuminye kumitwe yabo ne kwenda Nakyo. *Aye* waambile mba, “Matebulu onse a Lesa akayulatu malashila, kabiji kechi kwakonsha kwikala kintu kyabulamo biko ne.” Kabiji inge akyo kechi kyo kipikichala kya mu Yelusalema ne, kabiji ne kipwilo kya joja juba pa Kwiya Mesiyasa, ke kipikichala leelo kintutu kimo. Ke kwibwezhapotu aye mwine.

⁴¹ Pano, inge Lesa waamba mba *Aye* ukekyuba kintu, *Aye* wikyubile. Nangwa muntu mukwabo alanguluke byepi pa kikye, muntu uji yense waamba, inge Lesa waamba pa kintu kimo, *Aye* mwingilo-wanji kulumbulula kyokya Kyambo Ayemwine.

Kabiji ne kushinikisha Kwanji kwa Kyambo ke kulumbulula Kwanji Aye mwine. Monai, na kushiniikisha Mbila Yanji ya Mesiyasa. Aye walaile Mesiyasa byo akooba inge Waiya. Kabiji byo Aishile. . .

⁴² Kabiji ne kimye bamaana bakumusela byobatajile kukabeta kakumuzhika, kufuma po bajinga mu Babilona, kabiji bamwene kabaangabanga ka bumfumu. Bushe anweba mwayukamba kechi kwajingapo jishimikila japita ne, kafwako nangwa kuno, akyo kyakumwenako ne (akwa kobakonshe kulama akyo—akya—akya kimye kya kabangabanga, muntu mukantampe shayuka watubangabanga). . . Akwa kechi kwajingapo jishimikila japita jaambilengapo amba kujipo bamo bakimonapo kabangabanga ne. Kika? Kechi kyapainwe kwi abo ne, kechi bapembejilenga yewa musango ne. Bino abo bamaana bayukile amba kukekala aka Kabangabanga kakwa Yakoba wasanguka, kabiji abo batajilenga Kukyonkanya, kabiji Wapichile pa kimye Yesu kyo asemekelwe mu Betelema. . .

⁴³ Bino, Nayuka bisho byetu bya Bwinakilishitu, kijitu pamo nobe bipwilo byetu, biji na bintu-bivundakana. Anweba mwaya kukwe kabiji mwamona muntu wamaana ubena kwiya na kupopwela mwaana; kechi kujipo kintu kya musango yeo mu Kinembelo ne. Myaka ibiji palutwe yakwiya, kwiya kupita mu misanza kabiji ne kwabuka Mukola wa Tigris. Abo kechi baishile nakupopwela ng'ombe wakisonge ne, bino mwaana wamucheche wamyakya ibiji mukusemwa. Kikya kyokyaikajile byobyoy, pakyonkakya kimye kimo, Heloda waipaile baana bonse bakusemwa myaka ibiji kubwela panshi? Amba aye usakukonsha kwipaya Mesiyasa. Mwamona, abo. . . Lesa washinikishe mu Kyambo Kyanji.

⁴⁴ Kabiji aba banabalume bamaana byo baishile ku Yelusalema. . . aka kabangabanga ke batangijile kufika ku ntanda ya bupopweshi, Yelusalema. Kabiji byobyafikiletu batwela mubibelo, aka kabangabanga (kabumupashi kebatangijijile) kakaine kumweka kobaji jikwabo. Peulu-ne-panshi mu mikwakwa awe muntu wawama, muntu wabunoshi wawama wayula nabakamela, kabiji ne bikwabotu. . . peulu ne panshi bayilenga mu mikwakwa na kwamba mba, “Uji kwepi Aye wasemwa Mfumu wa ba Yudeya. Twamwene kabangabanga Kanji ku musela.” Kabiji awa musango mukatampe wa bupopweshi, pakupitapo myaka ibiji ya Mbila ya kwa kafunga, nangwa byonkabyo kechi bajinga na mukumbu ne nangwa Aye kechi wayukilepo kintu nangwa kimo pa Kikye ne. Mutwe wa madinominesheni onse kechi wajinga na mukumbu ne.

⁴⁵ Nanchi kyakatezhe bena Sanhedrin, kabiji baichile Banembeshi kwiya nakutanga. Kabiji batanga jishimikila ja Mika, ngauzhi waambile mba, “Anweba bena Betelema, kechi ye umo mucheche wa mu Yuda (ye umo mucheche), pakuuba anweba mukachi kenu mukekala kafinyala ukatangijila bantu

Bami, Isalela.” Kabiji panyuma ya kutanga Binembelo (nangwa byonkabyo bashinikishiwa ku meso abo), abo kechi be Kiswile ne, nangwa Kinembelo byo kyaamba. Nazhinauka bingi inge leelo abo bakonsha, inge Binembelo abya byalaiwa leelo byakonsha kusololwa. Amiwa kechi nakonsha kusapwila kwi anweba jibiji ne, bino Nasaka namba anweba mutambule kikye. Nangwa byonkabyo kechi bakonsha kuketekela ne!

⁴⁶ Aa maana akatampe akwa Taata alengela maana a muntu kwila akosama amba Aye wamukepesha muntu. Aye kiine wiya pakifulo kyakumulengela muntu wiuwva ayemwine kwikala wabuvu, kabiji aye kechi wakonsha nekwiyuka amba aye “walubankanya ne.” Aye ukijitu na jishimikila janji, nangwatu Taata ashiniikishe byepi amba Kyambo Kyanji kyakine kabiji Aye ubena kubatu byonka Aye byo alaile kuuba. Muntu ulanguluka mba maana anji aikala bingi kwi Lesa, inge kyabula kwiya mwaila maana anji, “Kika, kechi Byo kiji ne.” Akyo kyakine mu nkulo yonse, kikyubatu. Mwamona musango mubena kubiwa bintu byobyajinga, pano?

⁴⁷ Ny’anyi musango walutundaiko kuboba bantu babula kintu! Ba Malaika bayishilenga na kwamba ku batufunga, Bamalaika ba Lesa baishile na kwamba ku jibumba ja kafunga.

⁴⁸ Nakumya kana wajinga na jishuko ja—ja kwamba na kafunga nangwa kwikala na umo, pa kimye kicheche? Inge mwakonsha, Amiwa—Amiwa kechi natemwa kwikyamba ne mambo a ng’ambilo yami yo Mbena kukeba kwamba pa kimye kicheche, bino kafunga wikala namikoko kimye kyabaya poso aye kaseke nobe mikoko (nekutama), aye wamba nobe mukoko, kabiji unuuka nobe mukoko. Abyo ibyo, mambo uji na mikoko. Abyo byo byonka byo ayuka, ke mikoko yanji.

⁴⁹ Pano, Kyambo kya Bukine kyashinikishiwa. Kimye babo bakafunga, bekepesha, muntu wabula kufunda... Ke kyamushingi bingi, musango wakufikilamo aye kafunga kutambula mbila ipya yakusemwa mukoko. Kechi kyakonsha kwiya ku kintu kikwabo ne kanatu kafunga. Oene mambo kyo Asemekelwe mu kipe, kechi wajinga mu nzubo ne. Mukoko kechi usemekelwa mu nzubo ne, nangwa mukipatela mwawama bulongo ne. Mwamona? Basemekelwa mu kipaka, kabiji ne mu majimi.

⁵⁰ Ao oene mambo Aye *watwajilwe* Kukavali. Kechi mwakonsha kwendesha mukoko mujishinda jawama kuya mukwipaiwa ne. Bushe mwayuka kyokyo nyi? Mu kwipayang’ana, baji na mbuzhi utangijila mukoko. Kabiji kimye aye kyoafika kukifulo kyakwipaiwa, aye utolokapo ne kulengela mukoko kuyangatu. Mukoko wafwainwa kutangijilwa, kechi wakonsha kwitangijila aye mwine ne. Nanchi, onkao mambo, wafwaijilwe kwikala kafunga ubena kwiya...mikoko yanji. Byo bataine mwaana-Lesa monka mwaambijile muluwe amba

byo kikekala, kabiji byo bataine iye Mbila ya muluwe mu kijilamo banyama, monkatu mwaambila Malaika mba Byo kikekala.

⁵¹ Bino, Naumvwine bantu baamba mba, “Malaika waambile kwi amiwa, Aye waambile mba, *‘abyo ne bibye.’*” Bimye binga; kabiji Naumvwa bantu kwamba mba Malaika waambile kwi abo, kabiji ne kwibabula mba *“abyo ne bibye”* akyo kyajinga kyapusanako na Kyambo. Pano, nga Malaika wakonsha kuuba byepi kyokyo? Kechi kyakonsha kwikala byobyo ne. Kabiji umvwe Lesa wakubuujiile kintu kimo *kikananga-kikananga* amba kikamweka (obe *waamba* mba Aye wakubuula kyokyo), kabiji kechi kyamweka ne, nanchi kechi kyajinga Lesa ubena kwamba kwi obewa ne. Vulukaitu, abyoyi. Lesa kechi wabubela ne. Aye kechi utanwa mu bubela ne.

⁵² Kimye kyo bataine awa Mwaana, ke kyalusekelo bingi kibamwekela abo. Mambo ke Malaika wibaletejiile abo mbila, abo bataine byonka byokyapaniwe kwi abo kufuma kwi Malaika byoambile, kabiji monka mu kifulo Malaika po aambile mba byo kikekala. Kyajinga kintu kyafwainwa kwikala kwi abo!

⁵³ Mukijilamo banyama, kika? Mwamona musango wamokyaubijilwe kubabo bantu babula kintu mu kyokya kipe? Bushe mwakonsha kulanguluka byepi anweba byakonsheshe kubiwa kuboba bafunda byamambo awama? Aye wakonshe kubika pinyi monka mumona wanji, ne kwaamba mba, “Fumyaimo amiwa mukino kifulo.” Mwamona? Aye wakonshe kwikala wafumamo mukyokya kifulo, aye wakonsheshe kwikala mwakatazha.

⁵⁴ Bino, mwamona, kyajingatu “ponka pa nzubo” kwi kafunga. Lesa wayuka kwakutuma Mbila Yanji. Mwamona? Byonka byokiji. Mu yiwe musango bakafunga bajinga mukachi, mu bifulo byabo na Mwana mukoko wabo, Mbila yashinikishiwa yo baumvwine. Byo kyawama! Mu kyeenyi kya bu Mesiyasa, Kyambo kyashinikinshiwa kya Mbila yabo. Kimye bakafunga kyobauvwine amba Mesiyasa wajinga pa ntanda kabiji ne kwiya monka Mukyenyi Kyanji, monka mwaila musango wangikelo yabo, kabiji nekutana mba Mbila yajinga yakiine, yajinga yashinikishiwa, akyo kyokyalengejiile aba bantu kuvwa pa kutana mba Lesa waubile kikye kintu kikatampe kwi abo!

⁵⁵ Kika, bafunda baikele bavulangana kokwa pakyokya kifulo, monka mukyokya kintu, bakonsheshe kushala ponkapa bukiiji. Kika? Awe Muluwe waishile kubantu babula kintu ne batufunga. Kampepo kechi bakonsha kwikala ne... bibye... Bamo bano bantu babula kintu keboba bakonsha nekubula kufwachika mazhina abo, bebilubishatu. Anweba mwayuka batufunga abo Yesu bo asalulwile kimye kyo Ajinga pano pantanda, mu kutangijila mikoko Yanji, “Bushe watemwa Amiwa nyi, Petelo, kukila bibye nyi?”

56 “Ee, Nkambo, Anweba mwayuka mba Nemutemwa Anweba.”

57 “Mukajishe mikoko Yami.” Kabiji Baibolo waamba mba Petelo wajinga wabula kuyukapo kintu nangwa kimo kabiji banabalume babula kufunda ne. Ukisalatu bakafunga.

58 Ba membala ba kipwilo ba oa moba apita, ne mapulisiti, kabiji bafujishiwe-bulongo munyaunda bamuo moba bakonsheshe kutanwa pakyokya kifulo mukyokya kipe. Pano, Amiwa naketekela mba anweba bavula mwakonsha kukwatakanya (kampepo, anweba bantu muzhi) ke kintu kyanukilenga bingi kya Buyudeya, musango mokyamwekejile nobe byobya, nobe banyama bamukipaka, kabiji ne byokyajinga. Kika, bamo bafunda baleelo jino bakonsha kubula kutanwa pakifulo kokwa, abo—abo inge kechi bakonsheshe kutwela mukibelo. Bino akya kyatokeshe Lesa pamuchima, monka mwaila maana Anji abula kupela, mukwikisolola Akya kokyafwainwa Kuletwako. Aba bafunda, kabiji ne bantu bamaana bamuo moba bakonsheshe kiine kubula kwikitambulwila Akya. Abo bakonsheshe kulengeshiwa bumvu bingi mukukwatwa mu kyokya kifulo.

59 Kika, kintu kitanshi, inge babwelele ku kipwilo kyabo, kabiji abo bakonsheshe kwikala nabukamonyi mukutanwa kuyoya mbungeno, kabiji nekuketekela aja jibumba jabakafunga babula kufunda ne kuleta kintu kyapusanako kyakukumisha, bakonsheshe abo kwibafumya pakachi kabo kufuma monka mukipwilo. Bakonsheshe kutaiwa kufuma munyaunda ya mu Betelema, inge abo bakonsheshe kutanwa amba babena kuteleka kubantu babula kufunda jibumba ja bantu nobe byonka byajinga bakafunga. Kulengeshiwa bumvu, abo kiine inge balengeshiwe. Inge abo bakonsheshe kuvwang’ana na bantu basulwa yewa musango, kabiji byo kiji...baswile kuuba mba baketekele mba Lesa wakonsha kuleta Mbila Yanji ku jibumba ja bakafunga babula kufunda, kimye kyobajinga nabyonsetu byanengezhiwa kala. Bakonsheshe abo kutaya byakukwatankanya kwabo, bakonsheshe kupana bipepala byobo, kabiji abo bakonsheshe kubula kutulukiwa mukachi kanyaunda muo mabumba amumoba abo; mambo bauvwang’ene na kintu kya musango yewa, kabiji kechi na milanguluko yawama ne.

60 “Wakonsha kupana byepi!” pulisiti wafwaijilwe kwamba. “Mwaiya mukibamba kyami kyazhila kuno muyewa musango walubankana, nakokwa kubula maana, amba abo bantu bamungyetu babula kufunda bajinga kokwa kechi bakonsheshe...kechi baile ku...kupita monka mumusango ne. Kabiji ne kuketekela yoya mbila, amba, ‘Malaika waishile ne kwamba kwi abo?’”

⁶¹ Pano ibyepi umvwe muntu wakonsha kwamba mba, “Namona Mbila yanji yashinikishiwa?”

⁶² Aye wakonsheshe kwaamba mba, “Lekai amiwa bukiji bukiji nemupe bipepala byenu. Kabiji ne kufumyapo aye nyaunda!” Kimye kyapimpulwa, bino bantu kechi booba ne. Kampepo kyafwainwa kumweka ne jikwabo leelo, bafwainwa kutaiwa kufuma mu bipwilo byabo.

⁶³ Bino bakafunga bauvwine bingi bulongo monkamwa mukifulo na Mukoko wa Lesa. Kabiji kafunga yense wawama wauba kintu kimo. Umvwe kafunga wawama utala pa mikoko wakonsha kumona Kyambo kya Lesa kwikala kyaoloka patoka kabiji ne kushinikisha, mubyobya Aye byoalaille kuba, amba kafunga ponka pa nzubo yanji. Amiwa kechi natako muchima byaamba muntu uji yense ne, kuji “Lesi Wikilaile, kabiji Lesi wikyubile Akyo.”

⁶⁴ Baamba mba, “Moba abya kukumya apita. Kechi kujipo kintu kya kwamba mba Lubatizhilo lwa Mupashi ne. Kechi kujipo kintu kya kwamba mba Lubatizhilo lwa Mupashi Wazhila ne, akyo kyajinga kya batumwa.”

⁶⁵ Pakuuba lekai kafunga wakine wa Kyambo asapwile, mu bulume bwa lusanguko, amba Yesu Kilishitu ye umotu keesha, leelo, ne myaka yonse! Petelo waambile mba pa juba ja Pentekositi, “Mulaye walailwe anweba, ne baana benu, kabiji ne kubonse banji kwa lepa, ne bonse mo bavujila aye Nkambo Lesi wetu bo aketa.” Konse ako Aye koaketa, mulaye kabiji ne mapesho amo a kine. Kabiji lekai Kyambo-kyaulwa bukiine kimweke kubakafunga kyashinikishiwa, bonse bafunda masukuulu a mamboawama ba muntanda kechi bakonsha kumufumyako aye ne; mambo aye wayuka Lesi byo aambile, kabiji kyamweka. Byo byonka. Ke Kyambotu kya Lesi kimye kyonse. Kyambo Kyanji kyaalukile ke muntu ne kwikala wa ikelenga mukachi kabo, kabiji kechi be Kimwene ne.

⁶⁶ Aye walaile kintu kimo mu jino juba. Nakumya kana twakonsha Kwikiyuka? Betota ne bamaana kechi abo batambwilepo kintu kyabyobya ne. Kabiji baketekejile mba inge kwajingapo kintu kyayewa musango nobe Mesiyasa pantanda, Kyafwainwa kiine kwiya ku dinominesheni wabo. Kyakonsha kwikala jibumba jabo Bakamutambulwila, nangwa “Kechi kyajinga bulongo ne.” Pano, ngilangulukaitu byokyakosa. Inge kechi kiji mu jibumba jabo ne, nanchi... Bushe mwamona, nanchi? Lesi kechi watolelepo jibumba jiji jonse mumabumba abo ne, bino Aye watolele akya kyabula nekunungakanapo na kintu kiji kyonse. Mambo jibumba jimo jakonsha kwamba mba, “Mwamona kyo twauba?” Kabiji bakonsha kuuba kintutu kimo leelo. Pakuuba Lesi wasala uji yense, ao oene mambo Aye kyo asalulwile kafunga. Abo bakafunga bajinga bapwijijika ku nzubo na Lesi-wa mwanamukoko mukachi kabo, Kyambo

Kyanji kyaalukile ke muntu mukachi kabo. Betota ne bamaana kechi bekitamwbilepo Akya ne, kibapitaijile abo.

⁶⁷ Kabiji twakonsha kwaamba byavula bingi mu buleelo, nangwa mu nkulo iji yonse. Kyajinga kintutu kimo mu moba akwa Martin Luther. Kintu kimo mu moba akwa John Wesley. Kyajinga bintu bimo mu moba a ba Pentekosito. Bino Lesa kechi uleka kabungwe ka muntu ne! Aye utola Mupashi Wanji monka mu kushinikisha Kyambo Kyanji! Kyafwaijilwe kwikala ne kwiya mu kinje kyabo akyo nangwa kechi bakonsha Kwikitambula ne. Nobe byonka byobakosamitwe leelo byonse bipwilo, amba babena “kuya na kuuba *kikananga-ne-kikananga*, kabiji ne kukwatakanya bipwilo byonse pamo.” Inge babena kukeba muluwe pano, ng’anyi wakonsha kukwatakanya bonse bena Polotesintati, Katolika ne ma Orthodox, bintu byonse pamo, kulenga kipwilo kimo kikatampe.

⁶⁸ Pano, balongo, Amiwa najinga na jishuko ja kusapwila ku ma aduleendi a bupopweshi apusanapusana, kabiji muji bantu bawama bingi mu byonse bye. Bino pano, vulukai, Amiwa mbena kwaula, “Konse kabungwe kakaswa kiky, nangwa kechi kikekala bukabungwe ne. Kibena kwimukajikizha anweba.” Bushe anweba mwatangapo leelo pa kipepala kya Tucson akwa pulisiti wa Katolika wakwashishenga kutenteka maboko, amo mukipepala...mukukwasha kutenteka maboko, mu Missouri, ke musapwishi waki Polositanti? Kabiji ao ng’anyi wakwikituluka akya? Presbyterian, ba Baptist, Lutheran, kabiji ne ba Assemblies of God. Biji mu pepala wa Tucson leelo.

⁶⁹ Oo, ke kyakatazha bingi! Kechi ke muntu uji papo ne, ke abo bajibumba jabasapwishi, mitwe yakafulumende yavwangakanya kintu kokwa, ke ndonda yakwimutayamo monka nangwa anweba mubena kukeba nangwa ne. Anweba kechi mwakonsha kwikala bukabungwe ne kabiji mwapuluka kubukaji bubena kwiya pano pantanda, kabiji mwamona kana akyo kechi byo kiji ne. Amiwa kampe nakonsha kuya kimye kyokikamweka, anweba talai panyuma ku ao matepu. Kabiji inge kechi byokiji ne, Amiwa ne kamonyi wabubela. Inge byo kyajinga, Amiwa naamba Bukine.

⁷⁰ Abo bakonsha kwikitela Akye “mumusango mukwabo mokibena kwingijile amba mupashi watama” kwimena mwaila ndangulukilo yabo yawama. Anweba musakumvwa leelo ndangulukilo yawama: anweba mwabikatu milanguluko yenu pakintu kiingi, kabiji ne kulanguluka kyawama pakyokyo. Aye diabola wakonsha kuuba kyokyo! Kujitu kintu kimo akyo kitangijila pa byonse, kabiji akyo ke Kyambo kya Lesa. Inge ubena kulanguluka kyapusanako na Kyambo, lubaiko milanguluko yobe. Langulukai pa Kyambo.

⁷¹ “Mesiyasa,” bebakwachile, “aye kechi wakonsha kutanwa pakyokya kifulo ne, ke kintu kyatama.”

⁷² Bushe anweba mwakonsha kwikilangulukapo akyo kyawama, pulisiti mwine mukantampe, nangwa musapwishi, bonse baikala nabyavula byamambo awama, wakonsha kwiya ponka panshi mukipaka mwayula bincha? Kabiji ne kwiiswa Mbila yamuyanji kamulanda, kafunga wikepesha wabujile ne kufunda, kabiji bakonsha kwiya ne kwamba mba “Monai, Nakonsha Kwikishinikisha kwi anweba, awe ye Mwaana, awe ye Muluwe”?

⁷³ Kabiji mwayuka kika abo bantu kyobafwainjilwe kwaamba? “Awa muntu uji na bukishika, aye ke wa bukishika bingi mu byo Abena kwamba, bino kine uji mukilubo!”

⁷⁴ Amiwa namona bantu baikala bwikalo bwawama bingi poso bantu babula kuketekela, kechi bakonsha kwambapo kintu nangwa kimo pe abo ne, bino abo baamba mba “Aye waya mungi mu bukishika. Aye kechi wayuka kyo abena kwambapo ne. Lesa, Aye kechi wakonsha kubapo kintu kya yewa musango ne.”

⁷⁵ Bino abo kuno bajinga na bukamonyi! Kabiji panyuma yabukamonyi, “Yanga kokwa peulu mukipaka kabiji ne kumona kana Mwaana walaala monka.”

⁷⁶ Bakonsha kwamba mba, “Obewa watwalwa mungi na mupashi watama, ao wakulengela obewa kwamba kyokyo.” Nangwa byonkabyo kyajinga mwaila Kyambo kya Lesa! Kabiji abo bajinga bapomfu pakuba mba Bekimone, mambo maana abo akufunda kwamamboawama ebapofwele meso. Ke kyabulemo bingi!

⁷⁷ “Bakwachilwe mukyokya kifulo? Mukyokya kyatama kyajingako? Monka mukipaka?” Kimye kyo bajinga na kifulo kyawama Aye pa kwiya, bajinga na byonse bya Kumunengezha kwiya, kabiji mukulanguluka amba Aye wakonsha kwiya kokwa (kabiji ne kuya) kabiji nekubula kwibaletele bafunjishi Mbila. “Kabiji bakonsha Kupana ku jibumba ja bakafunga babula kufunda? Kabiji ne kuleta Aye mwine Mwananji, kabiji nekumulenga Aye kusemwa monka mu—mu kipaka? Ke kipaka kyalengululwa? Kyawama, mu—mu kijilamo ba nyama ne mashi? Kika, kechi kyakonsha kwikala byobyo ne!” Abo kechi bakonsha Kwikiketekela ne, mambo Kyajinga kyakosa bingi.

⁷⁸ Kabiji Kekiypela bingi, akyo kyalengela bamaana kimye kyonse kwikilengulula Akya. Ke kintu kyapela, Kibatupijile abo. Batajile mujishinda jakwa Lesa kokwa, kimye Aye kyoajinga ponka pano. Mwamona? Babena kutala kukintu kimo monka mujishinda, kimye akyo pokiji ponka pano mwi abo: Kilishitu, wasangukile kufuma mubafu, aye ujitu pamo keesha, leelo, ne myaka yonse.

⁷⁹ Bintu byonse byabo bikatampe byafumishiwepo. Bino kine kyajinga kya Bukine, kuuba mba “awa wajinga Mesiya.” Atweba twikiyuka leelo. Atweba twikiketekela leelo. Atweba twikiswa leelo.

⁸⁰ Bino inge Lesa walaile kintu kimo kya kino Kimishimishi, walaile kintu kimo kya jino juba, kabiji ne kushinikisha mba Kiji byonkabyo, kabiji tufumako kwi Akyo, atweba tuji pamo monka mukalashi ne abo bajinga kokwa mu joja juba amba Akya kibapitaijile; mambo Kechi—kechi kiiya mu tompelo ya madinominesheni etu ne. Oene mambo atweba kyotwaikela mukyokya kilubo kyakikye Kimishimishi.

⁸¹ Yesu Kilishitu kechi wafwa ne, Aye mumi. Aye uji muno leelo! Aye Baibolo waamba mba, “Aye ujitu pamo keesha, leelo, ne myaka yonse.” Aye waambile, mu Yoano Wazhila 14:12, “Aye wangitabila Amiwa...” (kechi yewa kitabila-mbijinga ne, aye *wamba* mba waketekela) “Aye wangitabila Amiwa, mingilo Yonguba ne aye ukeyuba. Kabiji ne yavula kukila pa iye ukeyuba, mambo Amiwa ngya ku Bataata.” Kabiji Amiwa na mumona Aye, mu bumi bwami amiwa mwine, kengila mingilo imo (byonka byo Aubile kyokya kimye) kukila ne byokyanembwa mumapaji ayiwe Baibolo. Kabiji waya peulu ya mutwe ne bamaana leelo, kabiji ne kwikisolola ku balukeke bonka bakonsha kufunda; nobe Yesu byo alombelejile. Kya kine, Aye wauba byavula kukila Aye... Namonapo mu juba jami, pa myaka saate-fiili ya mwingilo, Amiwa na mumona Aye kasa oba bintu byavula kukila byo Namutangapo Aye kuuba mu Baibolo; yavula kukila pa bintu bimo.

⁸² Bino nangwa Aye wikyubile pa kyokya kimye ne, anweba mwalanguluka mba ba Sanhedrin bamuketekejile? “Kyawama,” baambile mba, “obewa walubakanako.” Bino, tanai naipo, apo abo pabalengejile akya kilubo kwikitana pepi...mu kutana kintu, kechi nabyaamba mafujisho abo ne, pakuuba byaamba Kyambo Mesiya kikobiwa mu juba jabo. Kabiji apo ipo po tuuba kilubo leelo, kechi bapesapesa Binembelo ne. Yesu wibambijile mba, “Mukebakeba mu Binembelo, mwi Abyo mulanguluka mba mo tumwena Bumi Bwapeenape, nanchi Ibyo Bibena kunshimuna Amiwa. Be mubuula mba Yami Ng’anyi.”

⁸³ Monai, Lesa wayukile amba abo bakoba kikye, akyo kyokya *kika* Aye kyoekitwajijile Akya kubakafunga. Aye wayukile mba kechi bakekyuba ne, abo kechi bakonsha Kwikitambula ne. Pano mwamona kyo kyaikela bakafunga? Kika bakafunga? Bafunda masukuulu a mamboawama kechi bakonsha Kwikitambula ne. Kika bakafunga jibiji? Bushe Kyakonsha kwikala kyapusanako na Kyambo Kyanji nyi? Ine! Abo bajinga bakafunga, bayukile mikoko; kabiji abyoye byobyo asemekelwe, mukoko, mwanamukoko. Monai, Aye wajinga Mwanamukoko. Abo bajinga—abo bobonka ba muswa Aye. Ke kafunga ye yenka wafwainwa kuswa Mwanamukoko. Abo bayukile musango mwakikilamawizha Akya, kabiji nanchi byobyokiji ne leelo kimye kyotwatambula Mbila ya Mukoko.

⁸⁴ Pano akwa kupumana! Akwa kwikepesha bingi, muntu wabula kufunda kasa abena kulama Emanwele monka

mukipaka. Kyakila...Kabiji kwajinga bantu kokwa, pa moba onsetu amotu, mukufujisha maana amamboawama abo. Mabumba akatampe, babena kufuma konse konsetu, kufuma konse mukyalo, baishile nakupana mulambo kwi Yeboba waambile mba kwajinga "kakichi monka mummyona Yanji." Kabiji kono kokwajinga bakafunga bekepesha, monka mukipaka, nakulama Emanwele; Lesa Mwine waalukile ke muntu, kabiji nekulaala monka mukipaka. Monai, byo tuji na kufunda kwetu kukatampe, kabiji mutwe wetu kasa abena kunyuma nobe byo twayuka kintu kimo, kabiji Lesa wapitajile bintu byonse. Mwamona? Aye waubile akya Aye kyoalaile, kabiji Aye wikyuba kimye kyonse. Bino angilangulukaipo pababo bakafunga bekepesha kokwa babena kulama Emanwe-... Emanwele mu kipaka. Kibena kupuma pabaya. Kiine akyo!

⁸⁵ Nanchi akwa...Panyuma yakumupopwela Aye, kabiji batulukile amba aya Mbila yobajinga nayo yobasapwijilenga yajinga yashinikishiwa, akwa kobajinga...akwa kotukatotanga Lesa na Mbila yapanwa na Malaika. Pano esakanyai pamo na buleelo. Ngii pa kamineti ne kulanguluka. Muntu wamupopwejlenga Lesa, ne kumusachila Aye pa bintu byo bamwene, byo baumvwine, ne byo bayukile mba bya Bukine, na Mbila yajinga yaitabilwa namilanguloko yabumuntu. Kyajinga kyapusanako na milanguluko ya busapwishi bonse, kabiji nangwa byonkabyo kyajinga Bukine! Ke Bukine! Abo Bekiketekejile. Kabiji pano, nga maana a muntu wakonsha kwikala byepi! Nanci baambile mba jibumba jaba Malaika jaimbile lwimbo muntashi mupya. Bushe anweba ingilangulukaipo pakyokyo? Awa kafunga wabujile nekukonsha kunemba jizhina janji, uben akunuka nobe mukoko, kasa abena kwenda mumukwakwa, ne kubijika mba, "Lukumo lwikale kwi Lesa Mwiulu mwine! Twayuka mba Aye uji panopantanda!"

⁸⁶ Pulisiti waambile mba, "Awa muntu ke uji na kalangwe ne. Talai pa mabuuku ne kumone kana aye ye membela wa kipwilo kyetu. Aye witulengeshe bingi buvu atweba mwaila kufujisha kwanji kwakubula kufunda. Mufumyaiko kwi atweba. Atweba kechi tukalengeshiwa buvu mukachi kabantu ne."

⁸⁷ Kyawama, wakonsha kwikala walengeshiwa buvu mukachi ka bantu ne kutumbijikwa ku meso akwa Lesa; nangwa tolapo kusala kobe, mambo, vulukai, aja jibumba jabaspwishi jantompelepo mu joja juba kechi kyafijilemo mu Kyambo kya Lesa ne. Kechi kujipo naini aduleendi sikisite-naini ne byanguvino byapusanapusanana bya Kikye ne. Ke kutopa kumo, Kyambo kimo, Lesa umo. Byo byonka.

⁸⁸ Kwaamba mba Bamalaika baimbile nowela kwi abo, kabiji ne kwamba mba "baji na Mbila kufuma ku Malaika." Aye Malaika wamwekele kwi abo, wibapele Mbila, kabiji bayile na kutana yoya Mbila kwikala Bukine. Kabiji ne kwamba mba,

“Kufumyako kyokya, Malaika waimbile nowela itanshi kwi atweba.”

⁸⁹ “Mwakonsha kulanguluka nyi?” Baamba mba, “Awa mulongo kamulanda.” Abo kechi bajingapo na kintu kimo kyafwainwa kumweka mukachi kabo ne, mwayukatu, nanchi kyajinga lufunjisho lwapusanako kwi abo. Kabiji ao oene mambo kyo babujila kwi Kitaina mu Binembelo, kechi kyajinga kwi abo pakuuba mba be Kimone ne. Babula kwitabila bamaana, kechi pajipo kyabintu biji byonse byobapichilemo ne. Kechi betabila ne, bino akya Kyajinga kya Kiine. Ke Bukine, twayuka mba Ke Bukine. Langulukai! Kilishitu bantashi kwalula kabiji jibumba jitanshi jajinga bakafunga mikoko, kechi basapwishi ne; kafunga mikoko, bakukwata. Kika bakafunga?

⁹⁰ Monai! Kutoota ne kutumbijika Lesa pa byonse byo bamwene kabiji ne kumvwa, bauvwine kwimba kwaba Malaika kimye kintanshi ku muntu. Bamalaika bakyangye kwimbilapo muntu ne. Kabiji talai kujibumba jabang’imbi, musango mobaimenejile kabiji ne kufunjishiwa kabiji ne kufunjishiwa kumawi abo, “bakonsheshe kwimba pakusemwa kwa Mesiyasa,” kabiji bapitajile byonsetu! Kabiji ba Malaika baishile na kwimba ku kipaka kya mikoko, kechi na byakumvwala bya basapwishi ne, pakuuba na byakumvwala bya bakafunga. Kabiji talai kwi yewa watambwile Mbila pantashi, ke kubula kwitabila.

⁹¹ Kabiji kwepi ko kyapainwe, kechi mu makafidulo ne, bino mu kiselebwa, mu kiselebwa amo mwajinga Malaika wa Nkambo mo aishile. Kechi mu kipwilo ne, mungyetu. Aye kechi watambulwijilwe mu kipwilo ne. Abo balangulukile mba Byo ajinga, kabiji balangulukilenga mba baji Nakyo, bino Lesa washinikishe mba kyajinga kytama. “Aye wakonsha kwalula ao mabwe ke baana bakwa Abulahama.” Abo ibyo.

⁹² Kimye kitanshi ba Malaika kyo baimbilenga pa kusekelela, kyajinga Mwiulu. Inge mwakonsha kumona mu Yoba 38:7, (byonka byo Namona anweba bamo samunemba), kimye kitanshi Lesa kyo atangijilenga kulenga bilengwa Byanji bitanshi, ntanda. Yoba wajinga muntu mukatampe, muntu wajimuka, kabiji wajinga na misango yonse ya maana. Aye waambile, “Kimye Amiwa pakuya kukisankanyi, mwaana mfumu mwanyike, bonsetu bamfukamina amiwa, kabiji nkebatu kakimye kachechetu ka milangwe yami.” Kabiji aye kechi walangulukilepo kika aye kyoaubikijilwe mujoja jishinda ne.

⁹³ Kabiji nanchi Lesa wamwipwizhe, mba, “Ipatuleko obewa mwine nobe muntu, mambo Amiwa mbena kwiya na kwisamba ne obewa.” Kabiji kimye Lesa kyo aishile mu kazhimbiji, Aye waambile mba, “Yoba, wajingapi Amiwa kasa kyangye kubikapo bintendekesho bya ntanda? Kimye tubangabanga twa kumakya byo twaimbilenga pamo, ne baana ba Lesa saka babijika na

lusekelo, kwepi kowajinga, Yoba?” Kabiji aye wakatazhiwe pakyokya kimye. “Bushe obewa wajinga pi?”

⁹⁴ Monai, kimye kitanshi ba Malaika kyo baimbilenga pa kusekelela, kyajinga Mwiulu. Bino kimye kitanshi kyo baimbilenga pantanda, bajinga bakafunga pa kusemwa kwa Lesa, Emanwele pano pantanda; kintanshi muntu kumvwapo Malaika kwiimba, bajinga bakafunga bekepesha.

⁹⁵ Umvwe twatola banabakazhi betu bapenta-kilungi, suki yakwichika, bamvwala tuputula, kabiji nekukasa nobe kivwalo kya kipwilo kwibazhokoloka, kabiji ne kwimana ne kwimba nobe byobya, kabiji nanchi twalanguluka mba Lesa wafwainwa kuteleka ku kyokyo? Aye uji na Bamalaika kokwa bakonsha kumwimbila Aye konkakwa na...kasa akyangye Aye kulenga muntu ne. Uu-uu. Lupukaimo ne kwikala na bumi, kabiji ne kumvwala bya kuvwala abyo ke kyabunya kwi Lesa, kabiji mwakonsha kuketekela byepi kyokyo mba kyakwa Lesa? Mwaamba mba, “Kyawama, Amiwa nalamata ku...”

⁹⁶ “Kwepi kowajinga obewa kimye Amiwa kyonaajilenga kitendekesho kya ntanda? Mbule Amiwa kwepi ako Amiwa konebitujile byonse. Kwepi kwajinga kyokya yakutemesha kyeya? Kwepi obewa kowajinga nanchi?” Anweba mwalanguluka mba Lesa ye wafwainwa kwitwipuzha na maana etu. Milaangwe yetu ke bumbulwa maana kwi Aye. Aye uba byo Aamba mba Aye ukekyuba.

⁹⁷ Pano monai, Lesa ubena kunengezha kulenga bilengwa bikwabo. Aye ubena kulenga ntanda ya lufu, bumi bufwa. Bamalaika bembwa Mwiulu. Bino papo Aye ubena kulenga Bumi bupya, Bumi Bwapeenape ku muntu, kabiji Aye waimbilenga pa mitwe Yanji monka mu Bamalaika; pantanda, kechi Mwiulu ne. Mwiulu mwajinga na Bumi Bwapeenape. Mwamona? Kabiji Aye waimbilenga...baimbile Mwiulu, kimye kyalengelwe mubiji monka; kabiji papo bilengwa bibula kufwa bibena kwiya, kabiji pano babena kwimba ku bantu baji pa ntanda. Kimye kitanshi, ku bakafunga. Kyamwekele, nanchi kechi ibyo nenyi?

⁹⁸ Aye watatwile kilengwa kipya. Kyajinga kika? Ke kilengwa kya Ayemwine. Lesa walengelwe ke muntu ne kwikala waielenga muno mwetu. Abyo...Aye Baibolo waamba mba, “Mu ntendekelo ya kulengwa kwa Lesa.” Lesa walengelwe mu musango wa bumuntu; mwi Yesu Kilishitu, Mwaana Wanji, Lesa waikale. Aye washimikile tabbanako Wanji wa nyama ne bikupa, kabiji waikale mu yewa tabbanako; Lesa, *Emanwele*, “Lesa tuji nanji.” Aye wamushimikijile Ayemwine nzubo, kwikala mukachi kakyu, pakuuba mba Aye amweshe Kyambo KyANJI ku bantu Banji kupichila mukyokyo. Mwayuka Lesa byo aji, inge mwamona Kilishitu.

⁹⁹ Vulukai, kimye kyonse wambatu pa kusemwa kwa mfumu. Baanga bayukile kyokyo? Nangwa byonkabyo, wikyubile.

Kyawama, pano, mwalanguluka mba inge awe Mfumu wasemwa popa, awa mwana mukazhi wakonsha kwiya nakunyema lubilo ku kafindulo kuntu kumo, kabiji ne kwamba mba, “Nekulenga mwanya kwikala winengezha bukijibukiji, mambo Amiwa mbena kwiya nakuleta Emanwele pa ntanda”? Awa mwana mukazhi kamulanda waku Nazala, muzhi yebasula, ku . . . kwipi na Tucson nangwa puzha yonse yakukokolokelapo, kabiji nangwa byonkabyo awe mwanamukazhi mucheche mubiji waishile kasa abena kunyema lubilo ku pulisiti mukatampe kabiji waambile mba, “Amiwa—Amiwa mbena kupana kusemwa kwi Emanwele.” Bakonsha kumutaya mu kaleya. Abo kine bakonsha. Abo kine bakonsha. Ke kyabyonkabya kya kuletwa monka mukachi kabantu banji, aye kechi wakonsha kwikimena ne. Nangwa aye kechi wakonsha kwikyuba leelo ne. Bino ke kimotu monka mokibena kumwekela, ke kintu kimotu.

¹⁰⁰ Monai, kwafwainwa kwikala kwimba. Bamfumu bajinga . . . Aye kechi waimbilenga ne. Bantu inge kechi bakonsheshe kumwimbila Aye ne, mambo kechi bamuketekejile Aye ne. Kabiji ao oene mambo, kyo kyaikela byooyo, mwakonsha kwikitambula, ao onemambo bantu leelo kyobovwina buvu mukupopwela Lesa, abo bauvwina buvu Kilishitu! Mukatampe kafidulo kechi wakonsha kutambula Lubatizhilo lwa Mupashi Wazhila ne, babika bingi ndonda mwaila musango wabasapwishi mujishinda jakubamba kechi bakonsha kwimutambula Aya ne. Lesa usa kukatana muntu ao Aye yeakalenga wakupopwelamo. “Aye wakonsha kwalula mabwe ke baana bakwa Abulahama,” nobe byonka byo Ng’amba Yoano ne jikwabo.

¹⁰¹ Monai, bantu Banji bafwainwa kumwimbila Aye. Kabiji bantu Banji pa kyokya kimye bajinga ba Malaika Banji, kabiji baimbile ku bakafunga mikoko Banji abo bajinga bakutwala Mbila Yanji.

¹⁰² Ng’anyi wakonsha Kwikyumvwa patanshi? Nangwa byonkabyo, bamubufumu Bwanji. Abo bobakonsheshe kuteleka kwimba kwa Mfumu patanshi, bakonsha bonka bamubufumu Bwanji. Kabiji akya kyajinga kyaba mubufumu Bwanji? Kinda kwakupumana, nanchi kechi ibyo nenyi, batemwe? Kechi kyajinga basapwishi Banji ne. Kechi kyajinga bafunda masukuulu a mamboawama ne. Abyo ibyo. Kechi kyajinga bantu ba ki dinominesheni ne. Ine, kyajinga bakafunga mikoko. Kika? Kwajinga mukoko wasemekelwe, ao oene mambo. Mwamona? Bantu banji Bamumwine, ao Lesa ye ayukile mba tukamuketekele. Lesa watumine Mbila Yanji ku booba bakonsha Kwikiketekela. Aye ye milaangwe yonse; Aye wayuka kwakutuma Mbila Yanji, ao wakonsha Kwikiketekela. Awa Mukatampe wa Mwiulu kutumwa kumuntu walengululwa pono panshi pantanda.

¹⁰³ Yesu waambile mba, mu Mateyo 5, “Bapeshiwa ba

kamulanda mu mupashi, mambo kyabo ke Bufumu bwa Mwiulu.” Maliya, mu... Inge mubena kwibineemba Binembelo, awo ke Mateyo 5. Kabiji inge mubena kunemba Binembelo... Abyo byo Nanemba papo, ke Binembelo.

¹⁰⁴ Maliya waambile mba, mu Luka 1:52, kimye kyo ashingilwe manyi na Mupashi, Mupashi Wazhila kasa aji pe aye, aye waambile mba, “Aye wibatumbijikile abo bajinga panshi peene.” Maliya waambile byobya, inanzi Yesu, waambile mba, “Aye wibatumbijikile abo bajinga panshi peene.”

¹⁰⁵ Luka ne aye waambile mba, “Bantu babula kuyukanyikwa bamumvwine na lusekelo.” Kechi ke—ke kajibumba kacheche kabayukanyikwa ne, ka—ka kabafunda byamambo awama ne, ba dokotala bamizhilo ne byabulesa; pakuuba bantu babula kuyukanyikwa bamuvwine Aye na lusekelo, bantu bapanshi peene.

¹⁰⁶ Kupita mu Binembelo byonse byazhila, Mbila ya bukuzhi yapanwa ku bakafunga mikoko ne kupichila mu mikoko.

¹⁰⁷ Bino Nafwainwa kufika pa kupwisha, mambo tubena kwifika ku kimye kya kupwisha. Amiwa mbena kukilukapo Binembelo byavula pakuuba mba Nakonsha kwimutwala kuyuwe mulanguluko.

¹⁰⁸ Kupichila mubyonsetu Binembelo, bukuzhi bwapanwa kupichila monka mubakafunga mikoko ne mikoko. Abyo ibyo. Atweba bonse twaitabazhanya ku kyokyo. Kika? Kyajinga mu kivule ne kipasha. Kabiji kiji kyonse... Inge kechi Nakimonapo kuboko kwami ne, kabiji Natala papo pa kivule wa kuboko kwami, kabiji Namona Naikala naminwe faivi, Amiwa nakonsha kuyuka mba kibena kumweshesha; ne k yatama nakyo kyamwesheshenga kyawama. Kabiji ao oene mambo Mbila kimye kyonse yaishile ku... bukuzhi bwa mikoko, mambo kufuma kwine ku ntendekelotu... Kabiji kyajinga kupichila mu mikoko, kabiji ne kupichila mu bakafunga mikoko, amba Aye wisolwele Ayemwine. Byonse byajinga bivule ne bipasha.

¹⁰⁹ Pano twayai tutale pa ntendekelo. Adama ne Eva, kasa baimana mu kyeenyi kya Lesa pakuuba mba bomvwe Mbila Yanji kwi abo, bajinga bakobeka biseba byamikoko mumisaana yabo. Aya Mbila itanshi yauvwanyikile kala, yajinga yapanwa kokwa peulu ya kiseba kya mukoko wafwa, akya Lesa wasubile ne kupomba Adama ne Eva. Panyuma ya kweseka kulenga bupopweshi bwabo bene bwa mabula a mukuyu, kechi kyakonsha kwingila ne. Mulambo wamukoko wajinga waikajikwa ke mfutoyamambo kufumatu kutendekelo, mulambo wamukoko.

¹¹⁰ Pano, tusakushika kiky, ne kwi mumweshane ene mambo kika kyo kyafwainjilwe kwikela bakafunga mikoko; kabiji kika kyafwainjilwe kwikala, Aye wafwainjilwe kwikala mukoko.

¹¹¹ Pano, bangauzhi ba mu Lulayang'ano Lwakala bavwajilenga mu biseba bya mikoko (twayuka kyokyo, uu-uu), mu kumweshwa lwitabilo lwabo mu Kyambo Kyanji kya kwiya kwa Mwanamukoko walumbuluka. Ao oene mambo bangauzhi.

¹¹² Pano, Kyambo kya Lesa kechi kiiya ku wafunda masukuulu abyambo bya lesa ne, kechi kujipo...aye—aye ye yenka Wikizhobakanya. Abyo ibyo. Kechi kujipo kintu kya kwamba mba...Anweba mwamba mba, “Kyawama, awe muntu wafunda masukuulu amambo awama.” Akyo kyamulengela kwikala palepa bingi kufuma ku Kyambo kukila pa byonse byo Nayuka. Mwamona? Akye Kyambo kya Nkambo Lesa, aye Lesa ubula kwaluka, kechi upipula ne. Kuji konse mu Baibolo, Kyambo kya Lesa kimye kyonse kyaishile ku bangauzhi. Kechi ku bafunda masukuulu a mamboawama ne nangwa madokotala, ku bangauzhi! Kabiji abo jonse, kimye kyonse, bamukaine ne kupanga.

¹¹³ Bangauzhi nabo bajinga bakafunga banyama. Bangauzhi beikobaikile abo bene biseba byamikoko, mambo bavwajilenga biseba bya mikoko o bafungile. Kabiji mbila itanshi, ku—ku—ku kisemi kyazhatwa, yajinga peulu ya biseba bya mikoko. Bungauzhi, Amiwa naamba ne jikwabo, bavwajilenga biseba byamikoko ne kwibikobaika abo bene, mambo abo bashimwinenga pa kyokya, amba abo baketekela mba kubena kwiya mulambo wa Mukoko wafikilamo. Kabiji ne Kyambo kya Lesa kyaishile kwi abo peulu ya biseba bya mikoko. Abo bakafunga banyama...nangwatu bangauzhi javujisha banjinga bakafunga banyama. Abulahama wajinga kafunga banyama. Izaka wajinga kafunga banyama. Yakoba wajinga kafunga banyama. Mosesa wajinga kafunga banyama. Davida wajinga kafunga banyama. Bonsetu bemenako Lesa bekala bakafunga banyama.

¹¹⁴ Pano tusakwiya kutanepo maambo ka kyokyaishijile kuba kafunga mikoko. Bayukile mba mukoko uji wapelelwa kwakubula kafunga wakumutangijila ne. Abo...mukoko wikala wabula bukwasho, aye kechi wakonsha kwenda bunke bwanji ne. Ao oene mambo Lesa kyo apashang'anya baana Banji baitabila ku mikoko. Bafwainwa kutangijilwa. Bino tajishai ubena kwimutangijila anweba! Kechi mutole mbuzhi ne, aye ukemutwala kwakwipailwa. Lesa kechi witupele mbuzhi ne, Aye witupele Mwaana Wanji (aye Mupashi Wazhila) pakuuba mba etutangijile atweba. Aye ye Ntangi wetu, kachi kintu kyalenga-kumuntu bukafunga banyama ne, bino ke kyapana-Lesa bakafunga banyama bajisha mikoko ponka pa kajo ka mikokko.

¹¹⁵ Pano, mwatola ngulu, ne kwamba ku yuwe ngulu, “Amiwa kakulenga obewa kwikala mwanamukoko.” Kabiji mwamovwa aye. Kabiji mwamupenta nengala yanzi, kabiji—kabiji ne

bintu bikwabotu. Kabiji wamupa kajo nobe mukoko, wamupa musango wa—wa kajo. Kabiji ne kumubika aye panshi nangwa pange monka mu...akwa ku—kuji mukoko mukipaka, monka mubujimi bwa alfalfa nangwa kintu kikwabotu. Kabiji inge kujipo kuji mateshi kuntu kumo, awa nkumba usakuya konkakwa kuji ao mateshi mukimbo byonka byoakelwa kuya. Mwamona? Kika? Ke namambo akuuba mba musango waji ukiji ngulu.

¹¹⁶ Kabiji ao oenemambo bamembala bakipwilo, leelo, betumpa mubinntu byamutanda, monai, ke namambo a kuuba mba musango wabo kechi wapimpulwa ne. Abo basakuja musango yense wabusapwishi bwamambo awama bwakonsha kwiya, bino Kyambo kya Lesa kechi bakonsha kwimana Nakyo ne. Abo bakayamo ne kuteleka ku Kyambo...

¹¹⁷ Mwayukatu, mwine mukatampe kafutufuntu muntanda, ke awa lukikwangala wakala. Mu Baibolo, kwajinga bibiji byalupukile mubwato. Awa kikwangala wakala waile kabiji kechi wabwelele jibiji ne, mambo aye kekikwangala, uja bifwila. Aye wajilenga aya mibiji yanyama yafwa yalobele nameema kabiji nekwikuta jivumo janji nanyama ifwila. Bino kimye aye kyoalulukile kwi kunda nekuya, aye kunda kechi waimene pabyafwa ne, nanchi wabwelele ku nzubo ya Bataata kabiji Nowa, kabiji wapumine pa kibelo poso Nowa wamutwezhezhe mukachi.

¹¹⁸ Bino, kikwangala wakonsha kwikala popa ne kuja pa mbili wafwa, juba jonse, kabiji watumbuka waya mubujimi na kuja kajo na nkunda. Bino awa kunda kechi wakonsha kutumbuka kokwa ne kuja awa mbili wafwa ne, kabiji kubwela kuja kajo ne; kyakonsha kumwipaya aye. Monai, nkunda kechi uji na ndulu ne, kabiji kechi wakonsha kwi kigaya ne.

¹¹⁹ Kabiji umvwe nkunda yense wakwa Lesa, kiji Kyambo-kyoabena kuja nkunda nangwa mukoko, aye uwamisha muvumbo, inge mwaya na kwibapa bintu bya muntanda, bayuka Nkambo yabo waambile mba, "Aye watemwa ntanda nangwa bintu bya muntanda, butemwe bwa Lesa kechi buji mwi aye ne." Anweba mwamupa kintu kyapusanako na kyokya Kyambo kya Lesa, aye kechi wakonsha kwimana nakyo ne. Pakuuba diabola wakonsha kutola Kyokyo ne ntanda ne ayo, kabiji ne kwikitela mba Lesa yense. Kuba mwamvwangakanya manyi ne meema ne, kechi akonsha kumvwangakana ne.

¹²⁰ Abo, bonse bakafunga, bayukile amba mukoko kuba wakwashiwa kwakubula kafunga ne. Kabiji bajinga bakafunga, ne kuyuka mba wafwainwa kutangijilwa.

¹²¹ Ke kyabulanda bingi pakumona, leelo, amba bakeba kweseka kujisha mukoko, muzhinge. Bino aye mukoko kechi uja ne. Ine, mwane! Monai, baesekelenga kujisha mukoko, kunyuma kokwa, muzhinge. Kabiji kimye kyakwiya Kyambo,

abo baikala bapijilwa kala awa muzhinge, abo kechi bayukile Kyambo ne. Kabiji abyo byo byo kiji ne leelo, inge kintutu kimo kyashinikishiwa kabiji kyashininwa mba Lesa wakonsha kuuba kintu kingi. Nanchi abo bapijilwa kapela, kabiji kuja-kapela, poso anweba...kyawama, kechi kujipo kwamba nabo ne, kechi bakonsha kwi Kiteleka ne, byo byonka. Kabwa... Baibolo waamba mba, “Nobe kabwa byoabwela ku malashila anji, kabiji ngulu byoabwela ku mateshi anji, nanchi byo booba.”

¹²² Umwai Kyambo, kabiji ne kubwela jibiji konka kubujimba bwakala! Kabiji ne kwamba mba, “Aa, Ke kisangajimbwe. Kechi waketekela mu bintu bya yeo musango ne.”

¹²³ Lesa...mukoko byo oba kintu kimo leelo jino, bakonsha kuketekela mubyakuja bya Kyambo. Abo kechi bakasendapo jiilo ikwabo ne. Anweba kuuba mwibapa jibumba ja basapwishi ne, mukoko wakine. Ine! Ine! Umvwe mwaamba mba, “Pano talai, atweba bonse tukekala pamo. Bino, Yesu walombelo amba atweba bonse twafwainwa kwikala ‘umo.’” Obewa waumvwatu kintu kimo ku Tucson kechi papita kimye kyabaya ne, moba acheche apitapo, bino kasa kiji bubela! Yesu kechi walombeleo...Mujishinda ka Aye...Wakonsha kulengela Kyambo kwizhachisha Ayemwine, kwibwelamo Akyokine? Nanchi Lesa kechi wakila pa muntu mukwabo ne.

¹²⁴ Yesu waambile mba, “Babiji bakonsha kwendela pamo byepi kanatu baswang’ana?” Mwakonsha kusenda byepi ba Methodist, Baptist, Presbyterian, ne ba Katolika, ne kwibitaya pamo byonse ne kwikala ke umo? Obewa wakonsha kwikala umo mu mutwe wa muntu, bino Yesu waambile mba, “Bakonsha kwikala umo nobe—nobe byonka byo Nji kabiji *Anweba* mwi umo.” Pano, Aye witukeba atweba bonse mba twikale umo mwi Aye uji Kyambo! Amena! Abyo byo byo kiji, “Umo uji ne Bashanji.” Kabiji Taata ke Mwaana, ujitu pamo. Kabiji ke Kyambo kimo, akya Kyambo kyasololwa, kwimweshwa Akyokine mu jino juba nobe byonka byo Kyaubiwe mu juba jikwabo, pakuuba mba mwikale ke umo.

¹²⁵ Monai, Aye waambile mba, “Byonka Bataata byo Bantumine, nanchi ne Amiwa ne mutuma.” Ba Taata bamutumine Aye, baile mwi Aye na kwikajika Kyambo. Kabiji Yesu yenka utuma bantu Banji, kuya mu bantu Ye atumako; ne kwaamba mba, “Mingilo yo nguba Amiwa, ne anweba mukeyuba.” Kine, Aye walombele mba twafwainwa kwikala umo; umo ne Aye, kafwako nangwa umo wajinga na kabungwe ne. Kechi umo na ntachikilo ne, bino umo na Lesa. Mambo Lesa mu Kyambo Kyanji ye Umo, kabiji Yesu ne Lesa bajinga Umo, ne obewa ne Amiwa kabiji Kyambo kyafwainwa kwikala kimo. Abyo ibyo. Twafwainwa kwikala luvwang’ano lumo na Kyambo. Kechi nabyaamba muntu umo ne, akye kechi ke kilumbululo kyafyamika ne. Sendai Akya, byo Kyaamba, ne Kwikiketekela; kabiji Lesa uke Kishinikisha, ne kushinina mba Kijitu bulongo. Anweba mwalanguluka mba Ke kyabanababwangatu bonka

nyi, kisendai Kyambo Kyanji, yainga nakwikyeseka jimo ne kumona. Mukatana mba kikengilatu pamo nobe byonka Aye byo alaile. Ee, mwane!

¹²⁶ Abo pano kechi bakajapo kajo kapela ne, abo baji najilo yamukoko. Yoano Wazhila 10 wikimweshwa amba, “Mikoko yami yumvwa Jiwi Jami.” Kabiji umvwe Aye ye Kyambo, nanchi ng’anyi musango wa Jiwi jo Aji najo? “Mikoko yami yumvwa Jiwi Jami, benyi kechi bakalondela ne.” Mwamona? Yesu waambile mba, “Jiwi jenyi kechi bakalondela ne.” Nanchi, mikoko Yanji kechi ilondela jiwi ja bwenyi ne. Abo kechi bebalondela ne.

¹²⁷ Bangauzhi, bakafunga, ne mikoko, bonse bapana lushimuno lwa kwiya.

¹²⁸ Pano monai Lesa ubula kwaluka mu lunengezho Lwanji lwa lubula kwaluka bya mu Kyambo Kyanji jino juba. Pano ngilangulukaitu mamineti acheche: Kyambo kibula kwaluka.

¹²⁹ Pano talai! Inge—inge Mosesa waishile na mbila yakwa Nowa, inge kechi yaingijile ne. Inge Yoano Mubatishi waiya na mbila yakwa Mosesa kechi yakonsha kwingila ne. Inge Yesu waishile na mbila yakwa Mosesa nangwa mbila ya kwa Nowa, inge kechi yaingijile ne. Kabiji Wesley waishile na mbila yakwa Luther, kechi kyaingijile ne. Inge ba Pentekosito baishile na mbila yakwa Wesley, inge kechi kyaingijile ne; twauvwatu alwa lushimuno. Pano, Lesa utwajijilatu na kwenda. Anweba talaingatu Kyambo, mwamona po tuji.

¹³⁰ Nanchi kika kyakonsheshe kubula kwikela pantashi kubijikwa kwabakafunga...Inge bonse be bangauzhi, bonse bo bantu bakatampe bajinga bakafunga, pano kika Lesa kyo akonsha (awa Umo ubula kwaluka) upimpula jishinda Janji papo, kabiji ne Kwikileta ku masukuulu a mamboawama? Kyajinga bakafunga. Akwa kufika kwa Mukoko walumbuluka, awa mulambo-wabundengamambo, wakonsha kwiya na kafunga.

¹³¹ Aye kafunga wayuka mikoko yanji yawama kukila anweba bonse. Kechi kujipo nangwa umo wayuka mikoko nobe kafunga, aye wafunjishiwa pakyokyo. Neapo wayuka musango wakajo wakupana kwiabo byakuja. Abo...aye wayukile mikoko byo ikaja, kabiji aye wayuka mikoko yanji kupichila mu byo bajilenga. Na...anweba mwakonsha kumona kwaya mukoko kukajo-kakosa kabiji nekutatula kuja kajo, mwakonsha kwamba, “Fumyaipo kajo kefwila.” Mwamona? Nanchi Lesa wayukile akwa kwakwibatuma abo.

¹³² Pano twayai twite umo mukatampe wa bangauzhi-bakafunga bakwa Yehoba, pa kushinikisha mba Lesa wajinga mu babo bangauzhi baji mu kiseba kya mukoko. Pano talai. Tukakonsha kwita, pantashi, Mosesa. Twayai tutale kwi aye. Aye ukemweshwa mumwingilo wanji kwi atweba Yehoba monka

mwi Aye ngauzhi-kafunga. Pano, tusakusendatu umo, inge tuji na kimye, nobe pa mamineti teeni asakulondelapo, tusa kusenda abiji, bino kampe akye kisakwikalatu bulongo.

¹³³ Mosesa; Yehoba yewamubikile Ayemwine kuno, monka mukikye kya ngauzhi-kafunga. Aye wapewe bya bupe bisatu mukushinikisha mwingilo wani kabiji ne kwita bakulumpe ba bena Isalela, kabiji ne kwi Felo. Monai yuwe ngauzhi-kafunga, pano. Aye wapaine, kimye kyonse, bangauzhi Banji, kiyukilo kya bulesu, mu kushinikisha amba wajinga Lesa mwi abo; mambo kechi kwakonsha kwikala na kyeenyi kya Lesa kwakubula bintu byabumupashi bibena kumweka ne. Kechi twaikalapo nakumweka kwa Yehoba kwakubula byabumupashi kumulondela Aye ne. Kyafwainwa kwikala byobyo. Nanchi Aye kimye kyonse wishinikisha Ayemwine amba Wajinga na babo bangauzhi, mukushinikisha amba akya kyobaawilenga kyajinga ikyo, inge kyajinga monka mwaila mu Kyambo Kyanji.

¹³⁴ Pano, akya kintashi—akya kintashi kiyukilo kyapewe kwi Aye ku . . . yiwe kafunga-ngauzhi (talai), ke kwalula konto yansi ke mulolo.

¹³⁵ Kyabubiji, kuboko kwansi kwaluka ke mbumba.

¹³⁶ Kyabusatu, ke kutola meema kufumya mu Mukola wa Nailo mu Ijipita, kabiji ne kwi alula ke mashi.

¹³⁷ Pano, Aye wamupele biyukilo bisatu bya kushinikisha ku Ijipita, kabiji ne ku Isalela, amba wajinga Kyambo kya Lesa kyaambiwa.

¹³⁸ Pano, vulukai, Mosesa wamwichile mu kulengwa! Abyo byobiji. Watolele busenga kabiji nekwibutaya mumwela, kabiji ne kwaamba mba, “Lekai baluzhi beye,” kabiji baluzhi baishile. Waambile mba, “Lekai baluzhi beye,” kabiji baluzhi baishile. “Lekai babombwe beye,” kabiji ne babombwe baishile. Aye waletele bintu mukulengwa! Pano, muntu kuuba walenga ne, bino kechi wajinga muntu kya kutatwilapotu ne. Kyajinga Yehoba mu kafunga-ngauzhi Wani! Amena!

¹³⁹ Talai! Akya kyabusatu Aye kyobamupele kechi kyajinga kyalamata mwaila musango nkito yansi, nangwa kechi kyajinga kyalamata kubumuntu bwanji ne; akya kiyukilo kyabusatu. Monai, abyamba biyukilo bintashi bibiji byalamachile kwi aye, ayemwine kabiji ne nkito yansi. Kabiji bajingatatu na biyukilo bibiji abyamba Baibolo byo aamba mba “byajinga na jiji.” Kiyukilo kikwabo kechi kyajinga na jiji ne. Bino biyukilo bibiji bya painwe kufuma ku muntu wani, kabiji ne ku bantu bani, bajinga na mwi. Bino kiyukilo kya busatu, pano monai, kyapainwe . . . kiyukilo, kiyukilo kya busatu, kyajinga kiyukilo kya lufu: meema kwaluka ke mashi. Inge anweba—inge anweba—inge anweba mashi akonsha kwaluka ke meema, nanchi anweba mwakonsha kufwa. Kabiji apa pajinga mashi, aichikijile mashi, ke kiyukilo kya lufu; nanchi kyajinga kwi Felo. Kyabusatu

kyajinga kwalula meema amu Nailo ke manshi, kyajinga kya kumweshwa—kya kumweshwa Mbila yanji kwi Felo amba Lesa wetu ye Lesa wa Nailo, na lesa wa Nailo. Aye ye Lesa pa bintu byonse, kabiji Aye ukaleta lufu mu kyokya kyaalo. Kabiji abyoy byo kyajinga kiyukilo kya mashi. Oo, ami! Kiyukilo patoka kya lufu: mashi!

¹⁴⁰ Bino babiji bajinga na mawi a bungauzhi. (Na—Na—Naketekela mba mubena kutanga pano, mukachi ka mulaini, byonse byo Mbena kwamba.) Bino abya biyukilo bibiji byajinga mawi abungazhi ku Isalela mukutazha mwaila ngyalutwe yabo. (Pano kwi anweba mwajinga pa mutumba kechi papita kimye kyabaya ne, aja jibwe po jabikilwe.)

¹⁴¹ Pano, kabiji aye wailenga... aye ukapimpula bilengwa na lesa, pakuuba mba engijilemo. Talai kichi, talai awa mulolo, talai Kalunga Kachila, kabiji ne byonse byo Aubile, pano. Talai paboba bakufunga kasa babena kuya monka mujishinda nabo. Akya kichi kyajinga mukuboko kwa bakafunga, kyapitaijile byonsetu byaesekelelenga byakufunda kwamambo awama kabiji ne bintu byaambile mapulisiti, kabiji aya konto yaba kafunga ibatangijile bonsetu mukyonka kyakatazhiwe kintu ku muntu. Kimye Felo kyoaesekele kulanguka pakyokya kyapulankene mu mitumba kabiji ne kwichila meema aalukile ke manshi, nanchi Lesa waletete mujilo kufuma Mwiulu, kabiji Aye wanokeshenga kufuma Mwiulu, ne Aye—kabiji Aye wanonkeshenga panshi, ne bintu byonse.

¹⁴² Kika kyoaubile Aye? Kupichila mukonto yabakafunga, kechi ke—ke kabuku kakunembamo ne, kechi ke milanguluko yamaana akufunda amambo awama ne, bino ke konto yabakafunga! Tubena kwiya ku kyokyo mu kakimye kachechetu; konto ya kwa kafunga, Aye wiyubile. Kechi ke—ke buuku kamilombelo wa dinominesheni ne, bino ke konto yabakafunga. Kafunga utangijila mikoko yanji, ne kulenga jishinda jaoloka nobe byo baile ku Kyambo kyalailwe muntanda. Ke kintu kyawama bingi buleelo pa Konto ya kwa Kafunga, leelo, kutangijila mikoko Yanji ku Ntanda Ya Mulaye; kupitaila pa byonse bya masukuulu a mamboawama ne bintu byonse bya muntanda, kabiji ne bintu bya muntanda, ne madinominesheni, bintu byonse; kushinkula jishinda, kabiji ne kushiniikisha Kyambo Kyanji amba kya Bukine; Konto ya kwa Kafunga kasa ibena kuya kulutwe.

¹⁴³ Kabiji monai, aya konto ya kwa kafunga akyo kyangangijilenga mikoko... Mwaketekela kyokyo nyi? Aye kine wibatangijile mikoko, aye wibapokolwele kufuma mu Ijipita na yoya konto yamu kuboko kwanji. Twakonsha kwamba byavula pa kikye. Bino kupuma ku kyokya, aye watangijile mukoko kabiji ne kumutuma kubuchibishi bwamambo ponkapa pakumukana ku Kyokya! Aya yonka konto yaalukile ke jipesho ku umo, yaikele ke jifingo kubakwabo. Aa onka meema akwa

Nowa asapwijilenga amba akapulusha aye, wazhachishe ntanda. Aya yonka konto yatangijile bena Isalela muntanda yamulaye, yazhachishe abo bakaine kulondela awa kafunga-ngauzhi. Abyo ibyo, waikala ke nkoto ya buchibishi bwamambo.

Bilengwa na lesa; monai Lesa byo aamba mu musango Wanji. Inge twajinga na kimye. Nanembele nkalata kokwa: Lesa ubena kwamba mu musango Wanji. Kechi tuji na kimye kya kwi kishinikisha ne.

¹⁴⁴ Bino kikashinawinwa kulutwe, kupichila mumulolo walubemba ponka pekafunga mukoko-wakisonge (amba wamupombe aye mulolo kuzhokoloka, monka mungyetu), akye kyakine kibena kwamba pafuntoyamambo ibena kwiya ku misongo ne bubi.

¹⁴⁵ Aya yonka konto yaalukile ke mulolo kumeso akwa Felo, kabiji ne Felo waesekele kuleta babingelekesha. Kabiji nanchi ne Felo wakatataka ye waleelo, kabiji ne bakitabila-mbijinga, kupashang'anya kwa Mbila, mukweseka kusombolola akya kyonka kimo kwakubula kuyuka kokibena kufumina akya; kabiji ne kwikitaya Akyakyonka mu dinominesheni mukintu kimo, kimye Kyokikakasuluka kufuma kukyokya mumwela kufuma kokyakwata. Kiine! Bino kweseka kusombolola, kulenga akwa kusombolola.

¹⁴⁶ Bino, monai, aya yonka konto yabakafunga kubakwabo ke mulolo. Kwepi kwajinga aya milolo? Kwajinga makonto avula panshi, kabiji kwajinga konto imo yatolelwe. "Byonse meulu ne ntanda bikapita," byo byaambile Yesu, "pakuuba Kyambo Kyami kechi kikapita ne." Waambile kyabukiine kyaishile kufuntoyamambo abubi.

¹⁴⁷ Neapo, Isalela ngyalutwe yanji yapaniwe. . . kabiji Naambile pe Isalela, pano mungyalutwe. . . Akwa iko abo kobapaine byabupokolweshi bwa kufuma mubuzha bwa lufu kupichila mu kafunga-ngauzhi. Abo baletelwe kufuma mubuzha kupichila mu kafunga-ngauzhi nakonto. Mwamona? Kyaambiwenga na Mupokolweshi wa Isalela, kufuma ku lufu ne kalunga kabafu, na Ngauzhi-Kafunga ye tusakwambapo.

¹⁴⁸ Bino, pa byonse byo. . . byo twayuka Isalela, kechi watambwile Kyambo kya kwa ngauzhi-kafunga ne, bonse ba Isalela kechi bamutambwile Aye ne. Pano, monai, kwijizhanya. "Oo," kimye kyo aubilenga byakukumya, "aye wajinga mulongo mukatampe," pakuuba byo kyaishile ku Mbila yanji, "akyo kyajinga kyapusanako." Byonse biyukilo bikatampe bilondela mbila ipya. Twayuka kyokyo. Amwa mungyetu bejizhang'ene, monka mungyetu, kabiji bavula masauzande bafwile. Kyabukiinetu, akwa kwajingatu babiji abo bonka bapichile momwa mukupuluka kufuma mu tuu milyoni na afu, tuu kufuma mu tuu milyoni na afu milyoni.

149 Mwaamba, “Mba . . . Kika kyamwekele kwi abo?” Abo baya Peenape.

150 “Bonsetu, Mulongo Branham?” Yesu byo aambile.

151 Baambile mba, “Bashakulu betu bajilenga Manna mungyetu, kabiji batomenenga kufuma ku Jibwe.”

152 Kabiji Aye . . . Yesu waambile mba, “Kabiji abo, bonsetu, bafwa,” baabenamo Peenape, monai, bonsetu.

153 Monai abo bejizhang’ene pajoja jishinda Lesa jaanengezhe, oene mambo kyobafwijile. (Pano, pepi pepi, kechi mushalepo ng’ambilo icheche ne.) Bejizhang’enenga! Akyo kibalengejile abo kufwila mungyetu, bejizhang’ene pajishinda aja Lesa joanengezha: kupichila mu Mbila-ya muntu umo, ngauzhi, butangi bwa muntu umo. Mbulai kimye Lesa kyo aingijishe jibumba ja batangijila. Anweba kechi mwakonsha kwikitana mu Baibolo ne. Muntu umo, abo . . . Akye Kyambo kyaishile kwi Mosesa!

154 Kola; atweba bonse twayuka mba aye—aye winengezhezhe pamo kabiji ne kwikyesakanya pamo na Lesa kechi kwikalatu ne, ke kuba kintu nobe kyokya, mukulengela muntu umo kwikala na Mbila. Aye waambile mba, “Atweba bonse twi bazhila. Kika kyo twakonsha kubula kwikala na dinominesheni? Kabiji kika kyo twafwainwabujila . . . kwikala na *kikye*, ne kuuba *kikye*, kabiji ne kuuba *kyokya*?”

155 Lesa wabuujile Mosesa mba, “Ipatuleko obewa mwine kufuma kwi aye, Amiwa najinga na byavula bya mu *kikye*.” Kabiji vulukai, Yunda waambatu kintu kimo, mu moba akumpelo. Abyo ibyo, “Baonaikile amwa monka mwailakwamba kwa Kola.” Kabiji twayuka kyamwekele kwi Kola kabiji ne—ne kubonse bashala akwa kwipuzha pa Kyambo kyakwa Lesa kabiji ne milangwe yakwa Lesa ke byalenga muntu-umo: uji yensetu waonaikile.

156 Pano, atweba tukamumona Lesa monka mukafunga-ngauzhi, mukumweshwa Aye mutachi wani wakulutwe mwaila kiyukilo kikwabo. Pano, monai. Twikimona *kokwa*, pano twayai twikimone mu kiyukilo kyalondelapo.

157 Pano, monai, aye watuminwe ku balongo banji mu buzha, mukukaswa, na Mbila ya bupokolweshi, na kiyukilo kyapewa-na Lesa kushinikisha ng’ambilo Yanji. Isalela waile na Mbila yanji, be Iketekajile, bonsetu mwi abo, bino mu kimye kya mabaanga abufuku . . . Abo baile ku bya kukumya byanji, pakuuba mukimye kya mabaanga abufuku byo . . . wapaine Mbila yanji, “Kyajinga kyapusanako.” Bonse babujile kuketekela aya Mbila, bafwile. Abyo ibyo. Yajinga ng’anyi Mbila? Mbila yajinga ya kwiya kwa luzhachisho. Mukimye kya mabaanga a bufuku, mu kimye kya mabaanga abufuku, Lesa wapichile mu kampu wa Isalela pakuuba mba tuyuke inge bantu waketekejile Mbila

yakwa ngauzhi-kafunga Wanji; kabiji bonse babujile kuketekela Aye, baonawinwe.

¹⁵⁸ Pano monai, tusa kwikileta ku Kafunga Mukatampe mu bimye bicheche. Mwamona? Monai ng'ingijilo yakwa Kafunga-Ngauzhi Mukatampe. Ya byakukumya Byanji, kipwilo kyonse kyashikuka kabiji kya Mutambulwila. Bakebele amba bakolwa babo babukwe. Mukuba bintu bikantampe. Aye kuyukanyikwa kwanji kwajinga kukantampe. Bino kimye kyamabanga byokyaishile, juba jimo panyuma Aye waalula meema ke waini, kabiji wajishishe masauzande, shinkwa, kabiji waubile bya kukumya, Aye watatwile kwikala panshi ne kwisamba nabo. Kabiji Aye waambile kwi abo mba, "Amiwa ne Ba Taata twiumo. Kika kyo waambila obewa, 'Tubulai Bashenu'?"

¹⁵⁹ "Oo, mulongo! Awe muntu ubena kwiesakanya pamo na Lesa?" Akye kyajinga kimye kyabaya bingi ku milanguluko ya busapwishi bwabo. Bino kyajinga Bukine, Aye wajinga! Mwamona? Bino byo baubile, bavula kechi bamulondejile Aye ne.

¹⁶⁰ Nanchi Aye waalulukile ne kwaamba mba, "Inge ne kuja Mubiji wa Mwaana muntu, kabiji ne kutoma Mashi Anji, obewa kechi uji na Bumi mwi obewa ne."

¹⁶¹ Pano, mwalanguluka ka anweba ku wajimuka, muntu wafunda byoakonsha kulanguluka? Amiwa nalanguluka amba bamapulisi aba bajinga bajinga amwa monka mu tempo ne Aye bajinga bingi—bajinga bingi nabuvu na—na kwikala ne Aye monka. "Kulanguluka mba muntu wakonsha kwimana ne kwaamba kintu kyamusango yewa, 'Kanatu anweba bantu mwaja Mubiji Wami, kabiji ne kutoma Mashi Ami.'" Waambile mba, "Akye ke mbanzhi wa muntu, monai, 'Kuja Mubiji Wami ne kutoma . . .' Kika, aye ke nyama uja byamashi. Anweba bantu mulanguluka byawama muko . . . anweba mwafwainwa kufuma kuabya byonse byakisangajimbwe nobe byobya."

¹⁶² Aye kechi wakonsheshe Kwikilumbulula ne, Aye wikyamibiletu Akye! Aye wikyubile mukwibatuntwisha abo, mukwabanya mikoko Yanji kufuma kuba mbuzhi. Aye wikyubile mukwibataya kwibafumyako. Kabiji nanchi kafwako nangwa umo wakebele kuvwang'ana ne Aye ne. Abo kechi bajinga na lumvwang'ano kufuma pa kyokya kimye ne. Mwamona?

¹⁶³ Monai, mukimye kyamabanga, Lesa wailles kupita monka munkampu kabiji ne kumona ao wajinga nakuketelela. Kabiji Aye waubile kintu kimo mu moba akwa Kafunga Mukatampe. Monai ng'ingijilo yakwa Kafunga-Ngauzhi Mukatampe, bino monai kikye, ku baitabila ba Mbila Yanji, bino kechi . . . Ino Mbila ya mabanga abufuku, kechi bakeiketekela Ne. Abo kechi baketekejile mba Aye wajinga Lesa ne. Abo bakebelenga Kumulenga kwikala muntu wawama. Abo bakebelenga ku

Mubika ngauzhi. Aye wajinga muntu wawama, kabiji Aye wajinga Ngauzhi, bino Aye wajinga wakila pa kyokyo. Alo lo lufunjisho lwa bantu leelo, amba “Aye ke muntutu wawama, aye wajinga ngauzhi.” Aye kechi wajinga nakintu kyakwa Emanwele! Aye wajinga Lesa wamwekanyikile mwi Yesu Kilishitu Mwaana Wanji, kumulenga Aye ne Bashanji bamo. Abyo byo byonka byo Afwainwa kwikala.

¹⁶⁴ Zakaliya 14:7, Nakonsha kwamba kikyee, kyaamba Byeya bya mabanga abufuku ne Mbila jibiji mu kimye kya kumpelo. Bushe mwamona kyokyo nyi? Monka mobavujila balondejile Mosesa, bamwene Mumbulungwa wa Mujilo wamumwesheshe pa Mutumba wa Sinai. Aye waambilenga pa kikyee, kabiji waambile pa yiwe Mumbulungwa wa Mujilo kasa aimana mukipupu kabiji wamubujile iye Mbila, bavula mwi abo kechi ba Muketekejile ne. Pakuuba bonse ba mulondejilenga kufuma mu Ijipita, bafumine mu ntanda ne kwabuka kalunga ka lwabano, kabiji mungyetu, wamwene Mumbulungwa wa Mujilo umotu yeka ye aambilepo mukushinikinsha awa ngauzhi-kafunga kwikala ke kafunga wamikoko, abo be Kimwene, kabiji bavula ba mwiabo kechi baki Ketekejile ne panyuma ya Kwikimona.

¹⁶⁵ Monai byo kiji, ne jikwabo, Lesa kechi upimpula-bintu ne, awa Ngauzhi-Kafunga Mukatampe, batolele abo baikete ne Aye na yewa mwingilo Wanji wapa Mutumba Waolobeta; aye Ngauzhi-Kafunga Mukatampe, Ye tubena kwambapo, Yesu. [Kafwapo bijipo pa tepu ne—Waku.]...?...kabiji waumwine Taata, awa Mumbulungwa wa Mujilo umo, kasa abena Kumushinikisha, awa Mosesa washinikishe.

¹⁶⁶ Awa yeka Lesa umo Mosesa ye aambilepo, waishile pe Mosesa kabiji kyaitabilwa na Mumbulungwa wa Mujilo amba Aye wajinga Yehoba awa watangijile Mosesa. Lesa wajinga Aye ngauzhi-kafunga.

¹⁶⁷ Apo Aye utola Ngauzhi-Kafunga mukwabo, aye Ngauzhi Mukatampe, aye Mukoko Wakine, Yesu, kabiji watola nekufukula kwabantu basatu, kabiji nekwiwatwala ponka pa Mutumba Waolobeta, kabiji akwa nekushinikisha Yesu. Kabiji wipainetu Ayemwine ku bantu bakwabo, baambile mba, “Awe ye Mwaana Wami ye natemwa, mumvwayi Aye!” Kabiji byo batajile peulu, kechi bamwenepo muntu nangwa umo kupulusha Yesu yeka ne. Abyo ibyo. Aye wajinga Iye. Bino, akyo kypawisha byonse, monka mo Nayukila. Mwamona?

¹⁶⁸ [Kafwapo bijipo pa tepu ne—Waku.]...?...[Kafwapo bijipo pa tepu ne.]...?...kilungi. Mosesa wajinga mu kyeenyi kya Bulesa pa Mutumba wa Sinai. Kypimpwile kilungi kyanji. Byo aishile, aye wa—wa bikile kipembe ku meso anji, aye ngauzhi-kafunga Mosesa; ao Yehoba wajinga mu, kibese, kibesetu kimo, mu kilungi kyanji. Aye wajinga na Kyambo mukanwa kanji.

169 Bino monai Kafunga Mukatampe byo ajinga mu kyeenyi kya Bulesa. Kika kyokyaubile? Kyapimpwile kilungi Kyanji kyonse. Aye kechi wajinga lubaji lwakwa Lesa ne, Aye wajinga byonse bya kwa Lesa! Aye wajinga Emanwele.

Kika kyo kyafwainjilwe kwikala bakafunga?

170 Talai! Mwamona, pano, Lesa Wabulume bonse bubulakupela... mukwimweshwa Ayemwine, nangwatu, mwi Mosesa kafunga-ngauzhi. Monai Lesa byo emwesheshe Aye mwine. (Ino yo ng'ambilo yami yapelako.) Mumonai, aye kasa aimana washingwa mu kyeenyi kya Mumbulungwa wa Mujilo! Kafwako nangwa umo pa mutumba ne kanatu Mosesa ne Yehoba. Amena! *Amena* kyalumbulula mba "kikale byonkabyo."

171 Talai! "Bika kuboko kobe mu kwapa kobe!" Bino, monai kikyeye kiyukilo kya bubiji na jiji. "Bika kuboko kobe mu kwapa." Atweba kechi tujipo naluzhinauko ne kanatu kuketekela Mosesa wajinga kipiko-kuboko, nanchi aye wafwainwa kubika kuboko kwanji kwakilujo monka mukwapa kwanji, mambo muntu yense pepi kilujo-kuboko. Aye wabikile kuboko kwanji kwakilujo... Pano monai! Ng'anyi kipikichala kyo twamona papo, kya Yehoba mwi Mosesa ngauzhi-kafunga! Mosesa waimenako Lesa, mambo Lesa wajinga mwi Mosesa. Mumonai kubika kuboko kwanji... "Kuboko mu kwapa kobe." Ke kiyukilo!

172 Pano, papo waimana, na kuboko kwanji kwa kilujo mu muchima wani (kasa aimana *bibye*) apo byafyamika byafyamikile kufuma ku kintendekesho kya inontanda. Oene mambo bakafunga. Yesu ke kuboko kwa kilujo kwa Lesa, atweba bonse wayuka. Kuji Mosesa Pakumuleta byonka byo. Aye wajinga nakyafyamika kyaba Taata, kabiji wikimweshwa kwi atweba. Monai, talai aye kufumya kuboko kwanji kwakilujo monka mukwapa kwajinga nambumba. Wamwesheshenga Lesa byo akonsha kuuba na Kuboko Kwanji Kwa kilujo. Monai, mbumba kechi iji nalubuko ne. Monai, jikwabo, kechi kyajingatatu mbumba aya yonkane, kyajinga kine yonka yapelako, yatokatu nobe mabebe; kuboko kwanji kwapuminwe na kintu kiyatama. Nga Mosesa wafwajilwe kumvwa byepi byo akundosha kuboko kwanji kwa kilujo kufuma mu muchima wani, kufuma mu kyaji kyanji, kabiji kuboko kwanji kwapuminwe na mbumba! Mbumba ibena kwimenako bundengamambo, bwatamishatu, kabiji bonka bwine bwapelako nepakipimo.

173 Kabiji, balongo, amo imo ntanda mo yajinga kimye Lesa kyo amvwetwile Kuboko Kwanji Kwa kilujo kufuma ku kyaji Kyanji! Ntanda yajinga yapumwa na mbumba yapajuba nepajuba, kabiji kechi kujipo lubuko ne. Nanchi byo byokiji bufuku buno, mambo kechi bakatambula bukwasho ne. Abwa bukwasho bwaikajikwa pa Kalvali, bino bantu bakeba kutola ndondolwelo yalengwa-nabantu mukifulo kya ndondolwelo yakwa Lesa ya bubu.

¹⁷⁴ Monai byokiya kechi bitendebitende, nobe ntonda ya mbumba byoyuba, bino byonsetu ponkapotu! Byo asutwile kuboko kwanji, kwapuminwe, wayujilwe na mbumba. Monai Lesa byo aambile mba, “Pano, anweba kechi mukapitang’ananga mu bubi ne; pakuuba juba jo ukajako, aja juba jo ukafwa.” Kabiji abyo ibyo, “Juba jo ukajako.”

¹⁷⁵ Monai, kyajinga kafunga-ngauzhi awa wapuminwe ayemwine. Aye watolele, kupichila mu mikambizho yakwa Lesa, ne kubika kuboko kwanji mu kwapa kwanji, kabiji ne kwikupuma na mbumba. Aye ngauzhi-kafunga wikyubile ayemwine. Kabiji awa Ngauzhi-Kafunga Mukatampe, Yesu, kyaubilwe kwi Ayemwine, “Amiwa napana bumi Bwami pano, kafwako muntu wakonsha kutambula kufuma kwi Amiwa ne.” Aye wajinga Kafunga Mukatampe, Kafunga-Ngauzhi Mukatampe, “Kafwako muntu nangwa umo wikifumya kwi Amiwa ne, Amiwa ne kyuba pe Amiwa mwine.” Monai kechi kyaishile bitende bitende ne, kyaishiletu muka mineti. Aye Kafunga Mukatampe, Ayemwine, wasendele kuzhatwa kwetu ne kwipuma Ayemwine, wasendele bubi bwetu ne kwibubika pe Ayemwine. Kechi kyakukumya ne usapaula kyo anembejile mba:

Pakachi kakupana mabwe ne jiulu jafita
Mupulushi Wami wakunyikile mutwe Wanji ne
kufwa wafwile;
Kipembe kyashikukile kyasolwele jishinda
Kya lusekelo lwa Mwiulu ne juba jibula kupwa.

¹⁷⁶ Akyo kyafyamika kyajinga mu kyaji kya kwa Lesa pa yonse ye myaka, kyamvwetwa na kuboko Kwanji kwa kilujo, Yesu. Awa Kafunga Mukatampe wasendela Ayemwine akwa kuzhatwa kwetu. Isaya 53:6, waamba mba, “Aye waashilwe na mambo amizhilulwila yetu. Aye wafumpilwe na mambo abubi bwetu. Lukabisho lwa mutende wetu lwajinga pe Aye. Kabiji mo mubipumo Byanji mo twabukilwe.” Kyafyamika kya Lesa kya lubuko kikabikwa mu kyaji kya Yesu Kilishitu, nangwa Lesa, Aye wajinga ku kuboko kwa kilujo kwa Lesa, awa ye yenka Mukoko wa mukwachile pa kyaji Kyanji kyafyamika. Ao oenemambo abya byakimvule byajinga Kyokya kimye kyonse ke mukoko! Awa muntashi wajinga mukoko, ne wapelako wajinga Mukoko. Ao oene mambo kyo Aishijile ku kafunga, pa kuyuka mwakulama Mikoko Yanji. Anweba mwikyumvwa nyi? Monai, “Aye wakozhewe na mambo amizhilulwila yetu, wafumpilwe na mambo abubi bwetu, lukabisho lwa mutende wetu lwajinga pe Aye.”

¹⁷⁷ Monai, kyaishile bukiji bukiji; kabiji kyaile bukiji bukiji, oenemambo akwa kuboko kwakilujo kwatwajilwe kufuma mukwapa kimye kyabubiji. Aka kikola kyalufu kyaile, kimye byoekubikile kimye kyabubiji. Kabiji Kafunga Mukatampe, Ngauzhi-Mikoko, byo Aambile mba...Pa musalabo wa ku

Kalvali, kimye Aye kyo alipijile futo ya bubi pe atweba bonse, Aye waambile mba, "Kyapwa." Bubi bwapwile, malipilo afunto apaniwe, nkongole yapwile! Kechi kyasendele mwaka ne, nangwa kwiya monka mumoba akubwezhiwa akala nangwa kintu kikwabo ne, kyapwile ponkapatu bulongo nanchi!

¹⁷⁸ Bubi bwaishile mu kimye kicheche, na mizhilulwila ya Mizhilo yakwa Lesa, na konauna Kyambo kimo. Bufuku buno, balongo bami, mweo wenu uji kubushiya bwa kalunga kabafu mu cheni. Kabiji awa cheni kechi lufunjisho lwa sukuulu wa mamboawama ne, awa cheni kechi wa dinominesheni ne nangwa mafunjisho a bantu o ubena kwikalama ne, awa cheni ke Kyambo kya Lesa! Yesu wapaine kumuntu Kyambo Kyanji mukwikela konka, kabiji Eva waonawinetu kimo kyayewa musango kicheche Kyonka. Kabiji aye...cheni yense kechi wakosa ne kana ponka po anungakena panekena. Inge mwatola Kyambo kimo...Awa wajinga mutanshi mu Buuku.

Yesu waishile pakachi ka Buuku, ne kwamba mba, "Muntu kechi ukekela ku shinkwa bunke ne, kana ku Kyambo kyonse akya kifuma mukanwa ka Lesa." Akya kyajinga pakachi ka Buuku.

Wapelako mu Buuku, Aye waambile mba, "Yense ukatola Kyambo kimo (kyabula kumweka bulongo Kyambo kimo), tolai Kyambo kimo kufuma Papo, Amiwa nsakutola lubaji lwanji kufuma mu Buuku wa Bumi." Anweba mubena kupita mu ngehena, mwakobamine pa Kyambo kya Lesa. Kechi muleke muntu umo abike kintu kimo mwi obewa akyo kyabula ABOYBYOBYAAMBA AYE NKAMBO!

¹⁷⁹ Oo, Namona...Kyawama, baamba mba, "Kinetu, byonse byo twauba. Byonse byo twauba!" Abyo ibyo kapepo ng'anga mukatampe ne booba balangulukile mu moba akwa Kafunga Mukatampe. Abyo Eva byo alangulukilenga. Abyo Satana byo amubuujile, "Kine Lesa kechi wakonsha ne." Bino Aye wikyubile, mambo Aye waambile mba Ukeyyuba. Kabiji ao oene mambo Aye kyo akeyyubilamo ne jikwabo leelo.

¹⁸⁰ Kechi kyakukumya ne, Aye byo aambile mba, "Byonka byo kyajinga mu moba akwa Nowa, amo mwapulukiletu myeo eiti, mu meema, nanchi byobyo kikekala ne pakwiya kwa Mwana muntu." Monai, bachechetu, "Mambo kibelo kyakepa, ne jishinda jicheche biya ku Bumi, kabiji bo bacheche bakejimonu Ajo." Abyo ibyo. "Mambo jishinda jabaya jitwala kulonaiko, bavula bakatwelamo."

¹⁸¹ Kimye Kafunga Mukatampe kyo apuminwe, Ngauzhi-Mukoko Mukatampe, kimye Aye kyo apuminwe kunyuma kokwa, Aye waambile, "Kwapwa byonsetu!" Kabiji awa mineti, nobe katatakatu awa Kafunga wajinga wapumwa, byapwile byonsetu. Bubi bwapwile, kechi kwajingapo bubi bukwabo ne. Bajinga batokeshiwa, kuzhatwa kwalipijilwe. Abo baitabila

mazhina abo anembwa mu Buuku wa Bumi, batongwejlwe jimo kufuma ku kintendekesho kya inontanda, kypwile mukyonkakya kimye apo Yesu paambile mba kwapwa. Aye, awa Kafunga Mukatampe, waishile ku mikoko Yanji. Kyajinga kypwa, Lesa kuboko kwanji kwa kilujo kwakokelwemo kufuma mu kwapa Kwanji, kwapuminwe. Nanchi pa Mulungu walusanguko Aye wabwelele (amena), wasangukile jikwabo nakwapa Kwanji, kabiji watwajjikile akwa konka nanji kabiji ne Amiwa, monka mumusango wabu Kyambo Kyanji, mukwitukula atweba kubwela jibiji monka mumusango wetu wakala wamubujimi bwa edena amwa mwitufumishe bubi. Kyafyamika kya muchima Wanji mukatampe kyasolwelwe na Kafunga-Ngauzhi. Kyasolwelwe na Kafunga, Kafunga-Ngauzhi.

¹⁸² Kechi kyakukumya ne mitumba yatolokele ne kubijika pa joja juba. Kechi kyakukumya ne juba jafile kilungi kyanjo ne kubijika na lusekelo. Oenemambo bilengwa byonse byaponene; mwela wapupijile kubichi poso byasunkene kabiji ne kusunkena, kabiji nekunkutwa, kabiji ne kutolauka. Bamwene Kafunga-Ngauzhi, pa mutumba, ne kukuula jizhina jiji jonse mu Buuku wa Bumi. Kabiji bamwene mba musango wabo wakujilwe! Babijikilenga, ne kukilauka. Kabiji ntanda yaile mu kitentashi. Kabiji mitumba yalajikile, ne mabwe yalajikile. Kabiji ne juba jazhikile. Kabiji—kabiji ne bintu byonse byamwekele. Nobe mbung'eno iji yonse, inge Kafunga wasolola kwi anweba amba "kypwa!" Akwa...

¹⁸³ Amiwa namona bintu nakutolauka, kabiji ne lusekelo lwakutolauka, bino kechi kwajingapo muntu nangwa umo wakwikikozha ne. Mitumba yavumine, kabiji abo...juba jazhikile, ne bintu byonse byamwekele, pakuuba kechi kwajingapo muntu nangwa umo wakozhiwa ne. Kabiji Amiwa namona mbung'eno apo bulume bwa Lesa po kwasolwelwe ku bantu amba "bekale bakasuluka ku ntanda ne bintu bya muntanda," kabiji ne lusekelo lwa Nkambo lwayuzhizhe kipwilo. Baimene ne kubijika, kabiji bajijile, ne kubijika na jiwi jikatampe, konka kulukumo lwa Lesa. Amiwa kechi nakimonapo kintu kyatama ne, kimye kyonse bajingatu mu ndonda; mambo bayukile kuuba mba, jizhina jabo janembwa mu Buuku wa Bumi wa Mwanamukoko kitendekesho kyaino ntanda saka kikyangye kwaalwa. Awa Kafunga-Ngauzhi mukatampe wajinga na Mbila yaletelwe, kabiji abo bapokolwelwe, awa Kafunga-Ngauzhi. Nangwatu basapwishi bakwabo bambe mbaka pa Kikye, abo bayukile kyamwekele. Nobe boba bakafunga byo baubile kunyuma kokwa, bayukile kyamwekele.

¹⁸⁴ Kafwako muntu uji na nsambu ya kutwela mu desika wazhila kusapwila Kyambo ne poso aye byoakonsheshe kuba byonka byauble Mosesa, wasambakene na Lesa, ayemwine, apa ponka pampuzha apopakubula nangwa masukulu awamambo

awama poakonsha kubula kulondolola Akyo ne. Mosesa wajinga konka! Nangwa baluwe ba Isalela baambile byepi, “oo, kechi kyajinga namaana ne, anweba langulukaipotu aye kyoamwene akye; ke kyabumbula maana,” anweba kuuba mwamusenda Akyo kufuma kwi aye ne, aye wayukile! Aye wajinga konka! Aye wajinga iye kyamwekele! Kabiji kafwako muntu uji na—na digili wa masukuulu a mamboawama nangwa digili umo wa budokotala uji na nsambu kunyuma ya pulupiti, kwaamba Mbila ya kwa Yesu Kilishitu, poso patanshi wamukumanya Lesa kilungi ne kilungi mu Mumbulungwa wa Mujilo. Aye kechi ujipo na nsambu ya kwitela aye mwine mba ne muluwe ne, mambo bonse bafunda masukuulu a mamboawama ba muntanda kechi bakonsha kulondolola Kyokyo kwi anweba ne. Kyamwekele kwi anweba! Obewa wajinga konka, mwayukatu pa Kikye. Kechi natako muchima ku byaamba muntu uji yense ne, nangwa bakonsha kwamba byepi mba, “moba apita, kechi kiji byobyo ne,” anweba . . . kyamweka kwi obewa, kabiji kiji monka mwaila Kyambo.

¹⁸⁵ Ee, ao oene mambo Mosesa kyo aambijile na yiwe Jiwi jaambile kwi aye, amba Jiwi ja Kyambo. Aye wayukile mba Lesa wabuuji Abulahama, “Lukunwa obe ukekala mu kyaalo kyabwenyi myaka foolo aduleendi, bino Amiwa kebapokolola.” Kabiji aye wayukile mba myaka foolo aduleendi yapwakala kabiji aye wajinga waitwa kuba kyokyo.

¹⁸⁶ Banabalume ne banabakazhi, Lesa walaile mu ano moba apelako amba Aye uketulwila Mupashi Wanji pa bantu bonse. Aye walaile mba Ukatuma Lubatizhilo lwa Mupashi Wazhila, kabiji Aye uketa Musongwa wabula jitomya ne mafunye. Aye walaile kuba kyokyo, Aye ukeyyuba akyo. Kechi muvwe kubabo bakafunga batumwa ne, batwala bantu mungi. Aye Mupashi Wazhila ye Kafunga wakwimujisha kajo ka mukoko kufuma ku Kyambo. Kimye kyonse kiiya kupichila mu Kafunga. Aye ye Kafunga wetu. Telekai kwi Aye, anweba yenu mikoko ya jitanga Janji; inge obewa wi, umvwa Jiwi Janji. Kechi kyokya kyaamba muntu mukwabo ne, mwaumvwa byo Aamba. Aja jiwi jamwenyi, abo kechi bayukapo kintu nangwa kimo ne.

¹⁸⁷ Oo, ami, umwvai kukafunga-ngauzhi jikwabo, kulumbulula ne kuleta kwi abo, Yoano, byo aimene mu mukola wa Yondano, monai byo aambile, waimene popa na kusapwila, aye waambile mba, “Kimye kibena kwiya . . .”

¹⁸⁸ Monai, Yoano wajinga mwaana wakwa pulisiti. Abo kimye kyonse balondelanga pa—pa ndonda ya shabo, ajo jo jishinda jo tutambwilamo mazhina etu, mwaila byonse byo baubile, bebatelele byobyo. Kabiji Yoano wafwajilwe kwikala pulisiti nobe bashanji.

¹⁸⁹ Kabiji, mwayukatu, bainanji, byo aimene, panyuma ya Malaika wa Nkambo wasambakene bashanji ba Zakaliya,

ne kuya ku nzubo kwi Elizabeta, kabiji wajinga bang'ondo sikisi, pakuuba mba ekale maama, bino aye kechi wajingapo nabumi ne, aye wauvwine moyo mambo mwaana walukeke kechi wafunkile ne. Akya ke kyafwa.

¹⁹⁰ Kabiji Mupashi Wazhila, Malaika wa Nkambo wamwekele kwi Maliya, kabiji wamubujile mba “ukekala na mwaana, kwakubula kuyuka muntu nangwa umo ne,” kabiji wamubujile bya musango wakwa Elizabeta.

¹⁹¹ Aye waile kokwa ku tutumbatumba twa mu Yudeya, na kubuula Elizabeta. Kabiji byo akumenye Elizabeta, wamubujile mba “ukekala maama.” Kabiji aye kechi wikikwakenye ne, “kwakubula kuyukapo nangwa mwanamulume umo ne.” Bino waambile mba, “Aye Mupashi Wazhila wamunyeng'amijile, ne kwamba mba akye Kintu Kyazhila kikasemekwa kwi amiwa ukatelwa mba 'Mwaana wakwa Lesa,' kabiji Amiwa kamutumba Jizhina Janji mba 'Yesu.'” Kabiji kimye kitanshi jizhina Yesu jo aambilepo mu mwaana wamuntu, mwaana mucheche wafwa, munda mu bainanji, wamfunkile kabiji ne kubijika kukatampe kwalusekelo; kabiji nekutoloka monka munda mwa inanji, kabiji kechi kyajingapo nabumi ne poso pakyatambwile abwabumi.

¹⁹² Jizhina ja Yesu Kilishitu waambile bumi mu mwaana wafwa. Kika Akya byokikoba ku kipwilo kitela amba twasemwa jibiji?

¹⁹³ Kabiji nekubikwa nobe manyaki abena kutupauka mujito, kabiji lekai akya kiye. Kabiji namoya nakusangula kabiji ne kushimuna akwa kushininwa, kabiji ne kuzhachisha byonse byabumbulwa maana, ne kulengela Yesu Kilishitu kwikala umotu keesha, leelo, ne myaka yonse. Ke kimye kya Kimishimishi, balupuka Santa Claus ne bintutu bikwabo, kufumyako abya byonse byabumbulwa maana byakuyukanikwa. Ponsetu pomwafwainwa kumvwa pabya Santa Claus mu Baibolo? Ke busendwe bwa Kiloma, kechi pajipo kintu nangwa kimo pa kyokyo ne, kechi kujipo kintu kyabyobyoyo ne. Kechi mufujishe baana kyayewa musango ne pakyokya. Kimye juba jimo anweba mwamubula aye amba aja jishimikila jonse jajinga jabubela jampofu, nanchi anweba mwafwainwa kwikala namwana mububela. Kabiji kikozha lushimuno lobe pe Yesu Kilishitu, aye ukamba mba, “Kampepo Kijitu kintu kimo.” Bikai Yesu Kilishitu ke Kafunga-ngauzhi Mukatampe kubwela konka ku Kimishimishi akwa Kokitanwa.

¹⁹⁴ Monai, telekai ku yiwe ngauzhi, Yoano, byo aimene popa. Atweba bonse twayuka mba aye wajinga ngauzhi-kafunga mukatampe. Bino, aye wajinga na mbila, Malaika wayukile mba ukaleta Yesu.

¹⁹⁵ Bino, aye kechi wakonsha kuya ku sukuulu wa mamboawama ne. Bakonsha kwamba mba, “Pano, mwayuka

kyokyo Dokotala *Kananga-ne-kananga* ke muntu wafwainwa kusenda kifulo pano. Obewa wafwainwa kumulumbulula. Kabiji mwayuka kyokyo..." Monai, aye kechi wakonsha kumvwangakana na mwanamulume ne.

¹⁹⁶ Pa myaka ya naini yakusemwa, twabulwa mba, waile mungye na kwinengezha ku meso akwa Lesa. Apo ipo bakafunga po baishile. Monai aye mbila kechi yajinga yamasukulu amamboawama ne, na bintu bikatampe, nabyambo byazhika bya ma dingili. Aye waambile mba, "Oo, anweba kisemi kya miloolo." Kubuula muntu wabupopweshi, "Anweba jibumba ja milolo." Abyo byo amwene mungyetu, aye wamwene muloolo. Kintu kyakepesha kyo ataine kuuba mba kyajinga muloolo, kabiji wibechile mapulisiti ne basapwishi kabiji ne bafunda masukuulu a mamboawama ba mu joja juba, "Jibumba ja milolo!" Waambile mba, "Ing'anyi wimuji muna ku bukaji bubena kwiya? Kechi mwafwainwa kwamba mba, 'Atweba twiba ku *kikye*, kabiji atweba twiiba ku *kyokya*,' mambo Nemubula mba Lesa wakosha kwalula ao mabwe ke baana ba kwa Abulahama." Mabwe, abya byo amwene mungyetu. "Kabiji, katemo bekakungika kala ku mizhazhi ya kichi." Abyo byo amwenenga: milolo, bichi, kiselebwa. Kabiji, monai, aya yajinga mbila yanji. Aye kechi wayukile abya byambo bikatampe byazhika byabamo badokotala babulume ne, wakonsha kwikilondolola jishinda jijijose, aye wasapwijile monka mwaila ndonda ya bilengwa na lesa.

¹⁹⁷ Abyo byo tubena kumweshi: mukombo wa kafunga, kafunga, mikoko, yo ndonda ya bilengwa na lesa.

¹⁹⁸ Waubile byepi? Aye wajinga na kintu kikatampe kyakuuba, aye wajinga yewa wakonsha kuyuka Mesiyasa. Aye waambile mba, "Naamba namba, 'Aye waimana muno mukachi kenu ponkapano. Kabiji aye kechi wamuyukile Aye ne, mambo ao masukulu enu amamboawama emukashile anweba, anweba kechi mwayuka pomuji ne.'"

¹⁹⁹ Juba jimo Yesu waishile kasa enda, aye waambile mba, "Talai, awa wiya Mwanamukoko wa Lesa ye ufumya bundengamambo bwa ba panopantanda." Aye Mwanamukoko! Aleluya! Aye Mfuto yamambo! Kwaiya mukoko yense kufuma mu bujimi bwa Edena wamvwetwa na kimvule, Muntu uji yense ubena kwenda kuya ku mukola.

²⁰⁰ Baambile mba, "Yoano, wayukile byepi Kye? Amiwa kechi namwenepo kintu kimo kyapusanako ne."

²⁰¹ "Pakuuba Amiwa nashimuna, Namwene Mupashi wakwa Lesa kasa ekila nobe kunda, kabiji Jiwi jaamba mba, 'Awe ye Mwaana Wami Yenatemwa Monamwena lusekelo kwikalamo.'"

²⁰² Talai ku Nkunda ne Mwanamukoko. Mwamona? Ee. Pano ibyepi umvwe wajinga... pano ibyepi umvwe kyajinga kintu kimo... Pano ibyepi umvwe wajinga musuka waimana popa?

Kyawama, awa Mwanamukoko kechi wayile pa... nangwa awa Nkunda... Lesa wamupashang'enye Ayemwine na nkunda ne, wakila mukutekanya pa bang'onyi ba mwiulu; Mwaana Wanji na mukoko, wakila mukutekanya pa banyama bonse pantanda. Monai, ng'onyi wakila butoto mu meulu, kechi kikwangala ne; kechi kikwangala ne, pakuuba nkunda. Kechi ngulu, bino ke mwanamukoko ne. Kisemwa kikwabo kechi kyakonsha kukwatakana pamo ne.

²⁰³ Kabiji monai Nkunda byo aishile pa Mwanamukoko, Wamutangijile. Kechi mujishinda Aye jo afwaijilwe kwikyubilamo ne, pakuuba jishinda Bataata jo ba Mutangijila. Ajo jo jishinda mwanamukoko wakine leelo. Anweba mikoko ya kimye-Kimishimishi, kechi mwayuka mba Lesa utangijilatu na Kyambo Kyanji? Awa ye mukombo Wanji.

²⁰⁴ Monai kafwako nangwa kimo kyakonsha kubiwa ne, kanatu Yoano waambile mba, "Bashala kechi be Kimwene ne, bino Amiwa ne kamonyi, 'Amiwa ne Kimwene.'" Kulumbulula: "Talai, Mwanamukoko wa Lesa ao ufumya bubi bwa ba panopantanda."

²⁰⁵ Lekai pano Mbena kuleta Mbila ya Kimishimishi, kabiji kimye kyo Mbena kupwisha: "Yesu Kilishitu, ujitu pamo keesha, leelo, ne myaka yonse." Ke yewa Mwanamukoko umo. Aye ukijitu Mwanamukoko leelo byonka byo Ajinga kyokya kimye. Aye ujitu pamo nobe byonka byo Ajinga kokwa, mambo Kyambo Kyanji kijitu pamo. "Ponse paji babiji nangwa basatu bapwila mu Jizhina Jami, Amiwa nji mukachi kabo." Abyo kine byo Aambile. Aye kechi ukingya ne, Aye ye Lesa Kyambo. Aye kechi ukingya ne; watwajijila nakupa kumikoko Yanji, kabiji ne kwibajisha na Kafunga-Ngauzhi Wanji, Mikoko yanji nakajo pantashi. Kechi ku wafunda byambo bya lesa ne; ku mikoko Yanji.

²⁰⁶ Abo kechi bakonsha ne... Bakonsha kuja byepi bakwabo Bamuja. Bino bamaana... Monai kikye! Bino bamaana ne bafunda, bafunjishiwa-bulongo bya muntanda, bakeba kwamba mba kuji Santa Claus. Kabiji kuji misango yonse ya byubilo byatama ne bintu byo bapopwela, mambo kechi bakonsha kumwingijila Aye ne, Kyambo; mambo amwa mumadinominasheni yabo, Kechi mwafikila nakusonkakana ne, aba bakafunga bobatuma mujoja juba. Bebatuma kufuma kubyamafujisho abo, amba anweba bonse basaka mubikiwe mubuumo bwa mbuzhi, nachi kechi mwaketekela ne! Bakemutwala anweba pakyakwipailwapo. Umvwai ku Kafunga Mukatampe ao wajinga namyaka naintiini aduleendi yapitapo, uno ng'ondo. Kimye kimo kookwa, mu Mbila Yanji, bakafunga bakine abo bayuka mwakulama mikoko.

²⁰⁷ Monai, abo bakijitu nalusako lwakyo kyokya. Abo kechi bekiswa Aky a leelo jino ne, kijitu pamo abo babula kintu

ne, mambo kechi kyaikala pamo namabumba abasapwishi batompapo ne. Abo bakana kyokya Kyambo ne kwi kibika mu kabungwe kabo, kabiji kechi bakonsha kusapwila Kyambo ne. Abo kechi bakonsha ne! Baamba mba, “Kyawama, akyo kyajinga kya moba a batumwa. Kechi kyalumbulula *kikye* ne.” Kiji pamotu byonka byokikala na Byokyaambile, Kechi kikebewa muntu ne...?...wakwikilumbulula ne Akya kwiabo.

208 Pano twayai tukunyike mitwe yetu ne michima ku lukungu lwa panshi, kabiji nekuteleka bukiji bukiji kukiine kintu, ne kumona kabiji ne kutambula Kyeya amba akye Kyambo kyaleta awa Kafunga: aye Mukatampe Kafunga-Ngauzhi, Yesu Kilishitu aye Mwaana wakwa Lesa. Naambile kwi obewa kulepa. Amiwa kampe kechi nakonsha kubika byambo byami pamo nobe basapwishi ne, Amiwa kechi ngeseka kuuba kyokya ne. Amiwa ngeseka kwaamba Kyokya byonka byoekipana Aye kwi ami.

209 Bino, kana anweba mwamona kika kyokyafwainwa kwikala bakafunga nyi? Bakwabo kwajinga kwibafujisha mumusango mukwabo wamilanguluko poso abo byobankakelwe kwikitambula Akya. Kabiji leelo tuji na misango yonse ya bakulumpu, bantu ba pa kambi, mambishopu, mapulisiti, makandino, bapapa, bintu byonse mu ntanda, kweseka kwitutangijila. Bino Lesa witupele Kafunga, kabiji awa Kafunga ye Mupashi Wazhila.

210 Telekai kwi amiwa pano. “Kimye Aye...” (kechi mulanguluko ne, *Aye* ke ng’ambilo ya bumuntu) “Umwwe Aye Mupashi Wazhila waiya (Mupashi wa Bukine), Aye ukasolola abye bintu kwi anweba byo Nemubuula, kabiji ukemumweshabintu bikeya.” Awa ye Kafunga Mukatampe, Awa ye Kafunga Yesu yeasha. Kabiji Mupashi Wazhila wanembele Baibolo, Baibolo byobyobyamba, “Bantu bakala, batwajilwe twajilwe ku Mupashi Wazhila, banembele Kyambo.” Pano, bushe awa Mupashi Wazhila wafwainwa kukukoka obewa kuofunjisho nyi? Bushe Kyakonsha kukukoka—kukukoka obewa kukyokya kintu amba akye Kyambo kechi kyaamba mba? Kika, kyakonsha kwikala kyashupa bingi. Aye Mupashi Wazhila wafwainwa kwikala wabubela inge Aye waambile mba “*Abye* byo wafwainwa kuuba,” kabiji mwaaluluka ne kwamba mba, “Ine, Kyajinga kilubo, kabiji wauba byaamba kipwilo mba uba.”

211 Bino, inge ubena kuteleka ku kintu kimo, mukwabo wakundosa kufuma ku kine, Kafunga wakine ao ukakutangijila ku Kyambo, aye Mupashi Wazhila, kechi uji na kyakupitamo ne, kabiji kechi uji na bukamonyi bwa Mupashi Wazhila mu bumi boke ne, kwakubula...

212 Lesa ujitu Umo. Lesa ye yekatu uji na Bumi Bwapeenape, kabiji Aye ye Bumi Bwapeenape. Kabiji kintu kyonse kyajinga na ntendekelo kiji ne na mpelo. Kabiji umwwe wi membela wa kipwilo, wajinga na ntendekelo. Pakuuba Kyambo kya

Lesa kechi kiji na ntendekelo ne, Lesa kechi uji na... Kabiji umvwe wasemwa kwi Lesa, obewa wasemwa ku Kyambo, nanchi waikala ke mwaana wakwa Lesa, kabiji jizhina jobe ja bikilwe mu Buuku wa Bumi wa Mwanamukoko kitendekesho kyaino ntanda saka kikyanyge kwaalwa. Kabiji anweba, musombelo wasunki ye mwajinga nanji, musombelo wameso omwajinga nao, kipimo kya kimino kyo uji mwi obewa, Lesa wimumwene kintendekesho kya inontanda kasa kikyanyge kwikalako. Kabiji Aye wakumwene, muntu, nobe byo uji. Kabiji nangwa byonkabyo kwaishile myaka milyoni, kechi kujipo kintu kyonsha kukukanya kufuma muyewa walumbuluka ne kipasha akyo Lesa kyo akutongwejile jimo kufumatu ku ntendekelo, "Mikoko yami umvwa Jiwi Jami, mwenyi kechi bakalondela ne."

²¹³ Kabiji inge kechi mwatambula bobwa Bumi bwa Peenape ne, bufuku buno, kabiji anweba mubena kutala ku akya—akya—akya kijishimikila jabubela jachiche namwana walukeke walaala monka mu—mu—mu kipaka, kabiji ne jibumba jabamaana bazhokoloka, bushe anweba kechi mwaketekela byobya bintu nenyi. Kabiji kweseka kulanguluka mba, "Kyawama, Amiwa kekala wawama. Kabiji Amiwa nkoba *kikye*. Kabiji Amiwa kajoina kipwilo. Kabiji akyo kyokyonka kyo Mbeni kukeba kuuba." Obewa walubilamo. Inge kechi uji na Bumi Bwapeenape ne, wakonsha kwikala byeepi myaka ne myaka?

²¹⁴ Mwakonsha kutola jipeke ja jitaba, Amiwa kechi nasakamana ne nangwa kimweke kwikala kyalumbuluka byeepi, mwakonsha ku-... Sayaasi walengele kala akya kimo, akyo kyo mwafwainwa kuchiba anweba pa luntunanwa: kijitu namusango umotu wankafwa, musango umotu wamuchima, musango umotu wabyombesha mukyokya kijimwa kyakoma kufuma mubujimi, ke kintu kimotu. Anweba mwakonsha kwikibika monka mulabbolitali, kabiji anweba kechi mwakonsha kwikitela akya kimo kufuma kukikwabo: kimo kisakulengatu nobe byonka byokyawama aja jipeke washinkwa kufuma kukikwabo, kimo kisakulengwa musango umotu wajoja jipeke. Bino jishindatu jomwakonsha anweba kwikitelemo akya, ke kwikizhika akya. Kimo akya muntu kyoalengele, kyaikajikwa kokwa, ke kyabola kabiji ne kumena byonkabya. Bino awa Lesa ye alengele, uji na kakishi ka bumi, wikala na bumi jibiji.

²¹⁵ Mwakonsha kupashang'anya Mwinakilishitu, wakonsha kuya ku kipwilo kiji nobe Mwinakilishitu, wakonsha kubika jizhina jobe mu buuku nobe Mwinakilishitu, wakonsha kutwelamo na dinominesheni nobe Mwinakilishitu; akyo kyonsha kwikalatu bulongo, bino kanatu abwa Bumi Bwapeenape buji mwi obewa awa Kafunga Wawama wapaine Bumi Bwanji, pa kuchibiwako... Kimye Lesa kyo aishile pa

Pentekositi, Aye waishile mu bbola wa mujilo nobe byonka byo Aubile ku Mutumba wa Sinai, nobe byonka byo Aubile ku kafunga mutanshi, Mosesa. Kabiji kimye Aye kyakwiya panshi, Aye waabenye Aye mwine majimi amujilo mukwikala pakila umo umo mwiabo, Lesa wi abenye Ayemwine mu bantu Banji. Kabiji kanatu mwatambula byonkabyo. . . Petelo waambile mba “Kiji kwi anweba, kabiji ne ku baana benu, kuya kubajipalepa.”

²¹⁶ Balunda, kechi mwakonsha kuteleka ku byakufwanyikizha bya masukuulu a mamboawama ne, anweba mwasemwa jibiji. Kabiji umvwe byo uji, aye Mupashi uji mwi obewa ke lubaji lwa kwa Lesa, kabiji waikala bakamonyi ku Kyambo kyonse kya Lesa kwikala “Kya Bukine.” Inge anweba kechi mwapita kala mukyokya ne, lekai nanchi pano tuye konka kukipaka, akya Kyambo. Lekai tuye konka ku Baibolo, kufuma kubibye byamasukula amamboawama-amafunjisho a bipwilo, ku kyokya kiine kipaka, ku Kyambo kya Lesa amo Mesiyasa mo akayukanyikwa.

Na mitwe yetu yakunama, twayai tulombe.

²¹⁷ Lesa Mutemwe, abyo byo byonka byo Nayuka kwamba pa kino kimye. Tubena kufwenya kwipi ku Kimishimishi, mikwakwa yayula na banabalume ne banabakazhi, bansongwalume ne bansongwakazhi, kwishindaika, kwiponesha, kweseka kupota ne kupana mukubwezha muntu umotu ao wakonsha kwibapa nobe byonkabya. Bantu bavula abo beita abobene amba Benakilishitu baji monka mumikwakwa mukupota byafwanka, maalwa, bya kupana ku Kimishimishi. Lesa, kyamweka nobe babena kwikitaya kunyuma mu kilungi Kyenu, mukufunjisha baana babo kintu kimo kyamafunjisha abena Loma, byabantu byamasukulu amamboawama akwa Wazhila Nikolaita, bimo kebyabubela abyo byapela kwibitambulwila muntanda, kabiji byabwela byaya ne kiine kubena Kilishitu na Kimishimishi, awa Mukoko wakiine.

²¹⁸ Lesa, Nalomba, bufuku buno, amba byo tubena kukunyika mitwe yetu kutazha ku lukungu lo Mwitufumisheko atweba, . . . Mwabujile Abulahama kimye kimo, kafunga-ngauzhi mukatampe, “Fumaimo, Abulahama, kabiji nambala ya busenga iji pa kitulu kya kalunga.”

²¹⁹ Kabiji aye wabwelele muntanda, “Abo kechi bakukonsha kubala ne, Amiwa kechi nakonsha kwibabala ne.”

²²⁰ Pano Anweba mwaambile mba, “Talai mwiulu, ne kubala tubaangabanga.” Kabiji aye wayukile mba akya kechi kyakonsheka kubiwa ne. Kabiji Anweba mwaambile kwi aye mba, “Nanchi ne lukunwa wenu naye ukekala byonkabyo.” Twamona pa yoya mbila kufika ne ku yewa kafunga-ngauzhi, “kufuma ku lukungu lwa panshi, kuya ku tubaangabanga twa mwiulu,” kyakuuba mba nangwa kuji lufu mu mibiji yetu ya lufu

kwitutwala ku lukungu, kuji Bumi bwakonsha kwitusangula ku tubaangabanga.

221 Nobe byonka byo Mwaambile ku ngauzhi Wenu mukatampe Danyela, “Kabiji ne bonse bayuka Lesa wabo, mu moba akupelako, bakoba bikatampe. Ne booba balulwila bakwabo bavula ku bololoke bakasama kukila tubaangabanga twa mwiulu myaka ne myaka.”

222 Nkambo Lesa, Mulenga Mukatampe, Ao waswilenga kwiya pantanda mu musango wa Yesu, pakuuba mba muntu ayuke Lesa byo ajinga. Kabiji Anweba yenu Iye wafwaijilwe kutolako lubaji lwa lufu, kafwako Malaika ne, kechi wajinga na kyakupingakenyamo ne. Anweba yenu Umo wajinga kupana kwamalipilo, kabiji Anweba bunke bweni mwakonsheshe kwikifumyako. Kabiji kwikala Mupashi, Anweba inge kechi mwafwile ne. Bino Obewa walengelwe mu bumuntu pakuuba mba Obewa ufwe; kabiji waikala ke Mukoko pakuuba mba Obewa usende bubi Bobe Bwakulwa, amba Anweba mwibakujile abo kupichila Mumashi Enu Anwebabene.

223 Oo, aja jishimikila jajinga jikantampe, Nkambo, kyaya mumitwe yavula bingi. Kulanguluka mba: “Yehoba Mucheche, walajile mu kijilamo banyama, Aye wafwaijilwe kwikala nobe mwaana. Yehoba Mucheche, wasemekejilwe mukupaka. Yehoba Mucheche, kasa abena kukaya nabaana babachehe mumukwakwa. Yehoba Mucheche, mwanyike. Yehoba Mucheche, mwanasukuulu. Kabiji Yehoba, ye Wabulume.” Obewa watolele byonse bye bifulo. “Kabiji pano, Yehoba, aye Mwanamukoko. Yehoba, Ngauzhi.” Kabiji Anweba mwaikala na byonse bye pakuuba mba Anweba mwikale na kuzhatwa kwa bubi, kabiji ne kwitupa Bumi Bwapeenape.

224 Tulekelaiko mambo, Anweba Lesa, atweba, bakamulanda, bilengwa byabula kufikilamo bya mu inontanda. Atweba twikepesha bingi bufuku buno, Nkambo, kimye atweba kyotwatanga abyoo Anweba byomwauba kwi atweba, kabiji nanchi atweba twaubatu bicheche mukwimubwezhezhapo anweba. Anweba Byo mwakonsha kwiya mu moba a batangi bakatampe ba bupopweshi! Byo Mwakebelenga kwimana ne kumweshia Kyambo kya Taata! Musango Anweba momwanekeniyile abya byobya byamafunjisho abo! Kabiji leelo kyamweka nobe kechi kujipo umo ubena kukeba kwimana ne kabiji ne kwita Kyambo mba “Kyo Kyambo,” kabiji kechi kunekenya bintu ne. Twalomba, Lesa, Anweba mwitulekeleko ku bibye bintu byo tuji nabyo na mulekelesha. Kabiji atweba bufuku buno, monka mumichima yetu, nobe byotwipana kwi Anweba nobe mukupaka. Kabiji twayuka mba kimye kyonse Kupopa Kilishitu kyaitabilwa, kuji kusemwa kupya, kuji ne mukoko wakatataka, ne kwimba kwabo amwa Mwiulu na Bamalaika. Kasa babena kwimba nabyalulapilo, Bamalaika babena kwimba nejikwabo.

225 Twalomba, Lesa, amba inge kuji bamo muno bufuku buno abo babula kwimuyuka Anweba nobe Kya Bupe kya kwa Lesa kyakine, nobe Mupulushitu, kechi mwaila milanguluko ya bumuntu ne, kana kupichila mu kusemwa kupya kwa kusemwa ku Mupashi Wenu, lekai be Kitambule ponkapano, Nkambo, na mitwe yetu yakunama. Kabiji inge pajipo umo, Nkambo, ao wabula kuba kikye, lekai michima yabo batambule lusekelo ponka pano, kabiji batana nobe bakafunga bakala, mu kijilamo banyama ba mu michima yabo, Kyambo, ye Mesiyasa; akyo kikashinikisha kwi abo nobe Mupashi Wazhila, Kafunga Mukatampe wa joja juba. Twaipuzha kikye mu Jizhina ja Yesu.

226 Mukimye kyo twakunyika mitwe yetu, kabiji Naketekela michima yetu yakunama, mwakonsha—mwakonsha nyi, mulongo wami mutemwe, nangwa obewa wikale membala wa kipwilo...Kabiji Naketekela mba kechi Nakonsha kwimukozha pa kwamba byo Naamba ne. Amiwa...Kijitu bulongo kwikala wa ku kipwilo, twafwainwa kuuba kyokyo, bino, Obewa mulongo, kechi mwafwainwa kuswa kyokyo ne, mwafwainwa kusemwa jibiji. Abyo byo byaambile Kafunga-Ngauzhi Mukatampe, "Obewa wafwainwa kusemwa jibiji." Aye waambile kyokyo ku wafunda masukuulu amambo awama, "Wafwainwa kusemwa jibiji."

227 Kabiji umvwe wasemwa jibiji, kechi ke mambo akuuba mba waketekela ne. Baamba mba, "Obewa wasemwa umvwe waketekela."

228 Pakuuba Baibolo waamba mba, "Diabola waketekela, ne aye." Pano, monai, kechi kiji byobyoye ne, ke kyakupitamo.

229 Mwaamba mba, "Kyawama, Amiwa naikala bumi bwawama."

230 Nanchi ne batumwa byo baubile, bino kechi basemekelwe jibiji ne kanatu batambula Mupashi Wazhila. Abo kechi baalulukile ne poso byo batambwile Mupashi Wazhila. Mwavuluka anweba abwa bufuku kasa akyangye kumukana... nangwa kokwa kukana, kasa akwa kukana kukiangye kubiwa? Yesu waambile kwi Shimona Petelo mba, "Umvwe waaluluka, ukakoseshe balongo boke." Kabiji Petelo wamulondejile pa myaka isatu na afu, kabiji wapangilemo bademona, ne kubuka bakolwa, basapwijile Mambo awama, kabiji nangwa byonkabyo (mwaila Kyambo) kechi wajinga waaluluka ne.

231 Pano, mwakonsha kukeba yewa musango wa—wa Muluwe mu muchima obe bufuku buno? Inge—inge kine ubena kukeba Kyokyo...Kechi kijipo na lupusano na byaamba muntu mukwabo ne, Kyakine, mulongo, nyenga. Amiwa nayuka mba akya kyakiine. Mwakonsha anweba, kasa mutwe yensetu wakunama kabiji ne meso onse kasa azhizhibala, kechi kwi amiwa ne, Amiwa ne muntutu, mulongo wenu, pakuuba kwi Kilishitu wakonsha kusuntula kuboko kobe, kwaamba mba,

“Naketekela Kyokyo. Kabiji kine Nakeba mba Kilishitu uji mu muchima wami, aye mwine Kilishitu wabuka Kimishimishi”? Mwakonsha kusuntulako kuboko kwenu nyi? Lesa emupeshe. Akyo kyawama. Lesa emupeshe, ne anweba. Lesa emupeshe. Maboko ami, konse konse.

²³² Lekai kimweke, mulongo; lekai kimweke, nyenga; lekai kimweke, mulunda nami; ayuzhiwemo na Mupashi wa Lesa. Ng’anyi lupusano lujipo kyaamba muntu mukwabo? Vulukai, ke bumi bobbe. Atweba kampe kechi twakonsha nekwikala pantanda lukeelo luno ne, atweba kechi tujipo na—na kintu kyakonsha kwikajika bumi kukila akwa kupema ne atweba kotuji nako mubyona pano ne. Atweba kechi twakonsha kupeema ne, kanatu bupe bwa Lesa. Kabiji ng’anyi buwame bokyuuba, nangwa wikale na bumi wawama byepi kabiji ne. . . ? Yesu waambile mba, “Inge muntu ne kusemwa jibiji ne, aye kechi ukatwelamo ne.”

²³³ Bino, Nayuka *kyeya* kya kusemwa-jibiji byo kiji, bino twayai tumone byamwekele mu Baibolo kimye kyo basemekelwe jibiji. Petelo wajinga waitabila, batumwa bajinga baitabila, bino kechi basemwa jibiji ne poso panyuma ya Mupashi Wazhila wibaponejile pa Pentekositi. Pano, abo bakuminye kika kyamweka, kabiji Petelo waambile mba, na bashala, “Anweba muntu wa bena Isalela, akye kiyukanyikwe kwi anweba; Yesu mwina Nazala, muntu waitabilwe kwi Lesa mukachi kenu kupichila mu biyukilo ne bya kukumya ne bya kukumya, akyo Lesa kyoauble kwi Aye; Aye ao wajinga wayukanyikwa, mukulumbula akya kiji kyafwainwa kutwalwako na maboko atama ne kumupopa, Ao Lesa yeaimikile kabiji atweba twibatumonyi Bakwanji. Aye wasumishe pakuba mba anweba mukonshe kumona kebiji ne kuvwa, kabiji ke mwaila abya Binembelo.”

²³⁴ Kabiji pano, byo baumwine bibye, ne michima ibapile munda yabo, kabiji waambile mba, “Batemwe ne balongo, tube byepi pakuuba mba tupuluke?”

²³⁵ Petelo waambile kwi abo mba, “Lapilai!”

²³⁶ Pano, mulunda nami wa Katolika waikala papo, ao ye Nayuka foolo nangwa faivi waikala muno. Amiwa najinga na misambo na pulisiti wenu, kape kechi pulisiti *wenu* ne, pakuuba umo wajinga ng’anga wa ku Katolika, aye waambile mba, “Yesu wapaine bulume bwa kipwilo bwa kulekela bubi, ‘Yense bubi bo mwakonsha kulekela, kwi abo bwalekelwa; yense bubi bo mwabula kulekela, kwi abo kechi bwalekelwa ne.’” Akyo kyakine. Bino twayai tumone byo ekyubile, ne batumwa byo balondejilenga ndoonda Yanji, kechi mwaila jishinda awa—awa pulisiti jo obilamo leelo ne.

²³⁷ Bino ng’anga mutanshi wajinga ka, inge ubena kukeba kumwita, Petelo, wajinga na bakii ba mu Bufumu, pano aye

waambile mbaka kyuba? Aye waambile mba, “Lapilai, anweba bonse, ne kubatizhiwa mu Jizhina ja Yesu Kilishitu mululekelo lwa mambo, kabiji mukatambula wabupetu Mupashi Wazhila. Mambo mulaye walailwa anweba, ne ku baana benu, kabiji ne kubonse banji kwalepa, ne bonse mo bavujila Nkambo Lesa wetu bo aketa.” Kabiji inge Lesa watwajijika kwita, akya kyonka kyakupitamo kiji kwi anweba inge mwalondela kintu kimo kyakuba. Inge akye kipwilo kyaketekela Kyokyo, na mitwe yenu ya kunama, ne kwamba mba, “Amena.” [Jibumba jaambile mba, “Amena.”—Waku.] Nanchi, kintu kyonse Kikala kyapusanako na Kyambo, kabiji kechi kiji mwayila Kafunga ne.

²³⁸ Nkambo Yesu, baji mu maboko Enu pakino kimye. Nalomba mba muchima yense ashikuka bufuku buno ao uji na Kilishitu, Mesiyasa (kabiji Kilishitu ke Kyambo, Kyambo kyashingwa manyi kyasololwa), kabiji inge kujipo kushinkulwa kwa michima kuno bufuku buno akya kyankonsha kubula kwikala na Mesiyasa, akya kiine Kyabupe kya Kimishimishi, kiine kintu Kyabupe kya Kimishimishi kiji kuno, akyo Lesa kyoapaine kuntanda, kabiji ne kwipana Akya kuntanda ku bakafunga, wa Mwanamukoko Wanji, Mfuto ya mambo ya bubi, kabiji umvwe awa muchima washikuka bufuku buno, ubikwamo mwi akyo, Nkambo, ke Mesiyasa wa Kyambo kya leelo. Twibapana kwi Anweba mu Jizhina ja Yesu Kilishitu, Mwaana Wenu. Amena.

²³⁹ Bushe wamutemwa Aye? Bushe anweba Mwamuketekela nyi? “Fundai patanshi kusakisha Bufumu bwa Lesa, ne bololoke Bwanji, byonse byashala bikemupewa.”

²⁴⁰ Balunda, kasa tukyangye kupalang’anya bantu, Nasaka kwamba kikye. Bimye byavula, Amiwa kechi nashikwa bingi ne. Njina Mbila kufuma kwi Lesa, kabiji Nafwainwa kumweshwa yoya Mbila kuya kulutwe. Nayuka mba Akyo kechi bekikwatakanya ne. Inge kechi Kyajinga byobyo ne, nanchi kechi Kyakonsha kwikala Mbila ya kwa Lesa ne; Kechi kyakonsha kwikala byobyo ne. Kuji bintu byavula byakuba leelo Kukino kechi kya watakanya bulongo ne. Naketekela mba Lesa uji na muntu yense mu dinominesheni ne kabungwe ka ntanda, kabiji kechi kyaikala mba Amiwa naimena batemwe bami ne. Naishile kuno ku Tucson, myaka isatu yapita, kabiji najinga na mpwijilo ne anweba bamingilo konka ku Mulongo Gilmore, kabiji kyaipuzhiwe mba, bushe Amiwa “naishile kuno na kutatula kipwilo?”

²⁴¹ Naambile mba, “Ine, mwane. Naiya kuno na kukwasha *anweba*.” Bino Amiwa kechi nakipuzhiwapo ne, mu myaka isatu. Bino kijitu pamo, Amiwa nji pano na kwimukwasha anweba. Amiwa naiya nakukwatakana pamo ne anweba, kechi nakwinunga kutubungwe ne anweba ne, bino nakununga kana pomo ne muchima umo ne anweba na Kyambo kya Lesa, mukweseka kusapwila Mamboawama kumyeo yataika kabiji ne kumuntu yesne ao ubena kuteleka kumawi etu.

²⁴² Neepana amiwa mwine kwi Lesa, bufuku buno, na muchima wami yense, na byonse biji mwi amiwa. Amiwa kechi jipo na byavula bya kupanapo ne; Amiwa kechi nakonsha kuleta binuka bulongo byalibona, malina, ne golode ne, mambo Amiwa kechi njinabyo ne. Bino byonse byojinabyo amiwamwine ke akya Lesa kyoampa, mubuno bumi, Namupaine Aye jikwabo bufuku buno, ponka pa kijilamo banyama ba Kyambo Kyanji mu muchima wami; kabiji ne kumulaya Aye, kwimana na kyokya Kyambo, inge Aye wakonsha kuleka naikala mwaka mukwabo, wakishinka monka mo Nakonsha kwikela; sapwilai kyonse Kyonse, ne kuketekela byonsetu Bye; nanchi, nkwashai, Lesa. Musa kuuba kintu kimo kwi amiwa?

²⁴³ Tutambulai atweba, Nkambo. Twatambula Bupe Bwenu bwa Kimishimishi, Mesiyasa, Kyambo kyashingwa manyi akyo kimweshi Kyeenyi Kyenu pamo ne atweba, Nkambo, nangwatu lwikale lufunjisho lwa kipwilo byepi nangwatu dinominesheni. Twatana kuuba mba, atweba bene leelo, ntanda ibena kupona, kabiji papo Mesiyasa mukatampe waimana na maboko Anji achipuka: Yesu Kilishitu ujitu pamo keesha, leelo, ne myaka yonse, akyo kypangile milaye, amba mu ano moba apelako, kipwilo kyakonsha kwikala bukabungwe posotu kyaiya mu Laodikeya. Kabiji twamona leelo, Nkambo.

²⁴⁴ Kika kyo twafwainwa kuba, mutemwe Lesa? Kika kyo Nakonsha kuuba? Nkwashai ami ne babo bakafunga bakwabo, Nkambo, kuzhokoloka ntanda yonse, bakafunga ba Kyambo, na Kwibikeba, Nkambo, mu uno mwaka ubena kwiya. Tukwashai atweba, Nkambo, twalomba. Tupai Butemwe Bwenu kabiji ne Mupashi Wenu kabiji ne Kyeya Kyenu. Twipana atweba bene bufuku buno ku Kyambo Kyenu ne lwito Lwenu. Mu Jizhina ja Yesu Kilishitu, twatambula Kya bupe Kyenu kya Kimishimishi: Kyambo kya Lesa kyaaluka ke muntu mwi atweba. Amena.

²⁴⁵ Natemwa nyimbo ya kipwilo. Paulo waambile, mu Baibolo, “Kimye kyo Naimbanga, Naimbanga mu Mupashi. Amiwa nasapwila, ne kusapwila mu Mupashi. Inge Na...byonse byo Nguba, Amiwa ne kyuba byonse mu Jizhina ja Yesu Kilishitu.” Pano, byo kiji mba Akye kikala kyakosa kwi obewa, kabiji Na—Nakusachila, Naiya na iye Mbila, kimye kimo kyamweka nobe Amiwa nashikwa kwikyamba, bino nangwa byonkabyo Amiwa—Amiwa njina mwingilo, balongo. Inge Nabula kwikyuba, Amiwa nishi ne kafutufutu. Inge Amiwa nabula kwikyuba, Amiwa nakwikala wakusosomba milanguluko yamimwine, kabiji amiwamwine—amiwamwine lwitabilo mu Kyambo kya Lesa. Nafwainwa kwikyuba, kechi kwikala wapusanako ne, kana kwikala wakishika ku lwito lwami. Kabiji Nasaka kwimukwasha anweba bonse, Nasaka kuuba kiji kyonse kyo Nakonsha kuuba.

²⁴⁶ Pano twayai twimbe umo lwimbo mukatampe wa bimye byonse, Namutemwa bingi, *Amiwa Namutemwa Aye.*

Mwayukatu, Naketekela inge twakonsha ku mutemwa Aye, twafwainwa kuuba kyonse Aye kyo etukebejile mba tube. “Anweba Mutela byepi mba, ‘Nkambo,’ kabiji ne kuuba bintu byo Nemukambizha anweba mba mube? Anweba Mwatela byepi mba, ‘Nkambo,’ kabiji pano mwabula kuuba kyo Nemubujila mba ube?”

²⁴⁷ Bushi anweba mwakonsha kuteleka kuyewatu kafunga yebatuma amba wakonsha kwaamba mba, “bikai jizhina jenu mubuuku, kabiji nekwinungako; tolai kikye kijilo, kwamba *kikye*, kabiji kijitu bulongo,” kimye Kafunga Mukatampe Aye mwine waambile mba “kanatu muntu wasemwa jibiji kechi wakonsha kumona Bufumu bwa Mwiulu ne?”

²⁴⁸ Kabiji talai pa boba bafunda masukuulu a mamboawama ba mu joja juba, bafunjishiwa! Wazhila? Kwikala bwikalo bwatoka? Atweba kechi tujipo na kintu kimo nakyo leelo ne, jishinda jo baikelengamo. Kabiji kika kyaubiwe kuyewa Kafunga Mukatampe wibechile? Waambile mba, “Anweba mwiba kwa shenu diabola,” mambo kechi baubile. . . Abo bayukile Kyambo, pakuuba Kyambo kya juba jikwabo, kechi Kyambo *kyajoja* juba ne.

²⁴⁹ Inge bayukile kimye kya kwa Nowa, akyo kijitu bulongo, akya kyajinga kimye kyakwa Nowa; bino kechi kya konshekele kwingila mu kimye kya kwa Mosesa ne. Kabiji kimye kya kwa Mosesa kechi kyaingijile mu kimye kya kwa Kilishitu ne. Mwamona? Luther kimye kyanji kechi kyakonsha kwingila mu kimye kyakwa Wesley ne. Kimye kyakwa Wesley kechi kyakonsha kwingila mu kimye kya Pentekosito ne. Kabiji Pentekositi wauba kintutu kimo bashala byo baubile. Pano, ng’anyi ao usakumpa ami bukwasho bwamuaono moba apita kala? Nemwipuzha anweba.

²⁵⁰ Inge musele wa nsono waiya, kyokika? Kika . . . inge jibula ja wichi jaiya. Yesu waambile mba, “Kanatu jipeke ja wichi japonena mu mushiji.” Kika kyamwekele kimye awa koini wa wichi . . . nangwa awa wichi waponene panka pantanda? Kintu kitanhsi kyaishile ke awa mucheche waichika. Kechi kiji—kechi kiji nobe jipeke jatwelelemo ne. Talai ku bilengwa na lesa. Kechi kiji nobe awa lukunwa waile monka ne, bino kekyasendatu awa lukunwa wa Bumi. Kika kyaishile. . .

²⁵¹ Awa kilubi wanembele yewa buuku waya bingi kuwa, *Aye Lesa Wazhindama*, kyaamba mba, “Lesu wakonsha kushiinkuka byepi Kalunga Kachila, kabiji ne kwimana kupita mu myaka kiambi kimo kya mankulo a fishi kabiji ne kumona baana babacheche bajiile na babokwe, kabiji ne bantu kasa baimana pa musalabo, kabiji nekumutapa monka mukipango ne bintu, kabiji kechi kwajinga ne kuzhikula kanwa Kanji ne?” Mwamona, Kyambo ke lumwekesho.

²⁵² Awa ye wichi, kimye kyatatwile awa wichi wakiine kufuma kutendekelo, kyankakelwe Lesa. Kabiji pa kupezhako kwaishile Wichi, kumweshwa kine kya kwa Lesa, ao wamwesheshe Kyambo Kyanji kyonse amba Aye wajinga Kyambo. Pano Lesa wamupele Aye Musongwa pa Pentekositi; pakuuba awa Musongwa waponene mu mushiji kupita mu mankulo a nfishi, byonkabya biji awa wichi wakiine waubile, Waponejile monka. Kabiji kika kyabujilwe kumweshwa kyubilo? Mambo kyafiwe monka mushi yantanda, kyajinga kyabola kasa kikyangye kubulwa kuletwa bobwa bumi.

²⁵³ Bino kwaishile pulisiti mucheche kimye kimo, wajizhina ja Martin Luther, kabiji aye wamwesheshe Kyambo kimo kya Bukine: “Baoloka bakekela ku lwitabilo,” kwaishile jibula; nanchi musele mukwabo wamulondejile, Zwingli, kabiji pano kwaishile Calvin kabiji ne Knox kabiji ne kuya kulutwe.

²⁵⁴ Kintu kitanshi kyonayuka, kyapipulwa makonko, ke kyaiya monka mukimbo. Pano, akya kyamwekele nobe kyajinga, bino nangwa byonkabyo kechi kyajinga kintu kyakine kyapichile mu mushiji ne, kwaishile Wesley. Kufuma mwi Wesley kwaishile kipwilo kya Methodist, kufuma mu kipwilo kya Methodist kwaishile ba Nazarene, United Brethren, ne bakwabotu. Pano kyaubile byepi? Kyaponene jibiji kabiji kyapanga, talai nobe jipeke ja wichi, Pentekositi.

²⁵⁵ Pano, monai Yesu, mu Mateyo 24:24, “Mu juba japelako, mipashi ibiji ikekala pepi bingi kyakuuba mba ukajimbaika bonka Basalululwa, inge kyakonsheka kubiwa.” Pano, aja jipeke ja wichi byo jamenene, wichi yense wayuka mba akye kyamwekele nobe kyalumbuluka, jipeke ja wichi. Bino anweba mwabika panshi kabiji ne kutwala monka mukuboko, kyaishinkuwa kokwa. Kechi mujipo wichi momwa ne, ke kipu. Bino akwa kwini kunyuma, monka muikulosikopu anwe momwafwainwa kumona kicheche kyabaya, akwa kwaiya lukunwa. Kabiji nanchi nga akya kipu kyubaka? Kekilamawizha awa mwine lukunwa, kukukaba kwa juba kyakonsha kwipaiwa, kilamawizha awa lukunwa poso awa lukunwa wakoma. Kabiji umvwe jipeke jakoma, jinkuzhi jafumapo. Bino, bushe anweba mwamona, awa lukunwa nanchi amba waiya jibiji, wafwainwa kwikala musango umo wa lukunwa yenka waya panshi.

²⁵⁶ Panyuma ya kusangululwa kwakwa Luther, kwaiya kabungwe. Panyuma ya kusangululwa kwa kwa Wesley, kwaiya kabungwe. Panyuma yakwa Alexander Smith, John . . . Alexander Campbell, John Smith, bonse bashala, baishile ke kabungwe. Panyuma ya Pentekosito, yenkawa waiya wakiine wakyokya kintu, bino kwaiya monka mukabungwe. Kika kyaubiwa kyokya? Kwikifumyako akya.

²⁵⁷ Twaikala na myaka fifitiini ya kusangululwa, kechi kyayukanyikwa mu jishimikila jonse ne. Kabiji talai, mu kukwe

kusangululwa kwa myaka-fifitiini, Kyakumbana kuzhokoloka ntanda yonse, kabiji kechi kabungwe kamo kashimikwa mwi Akyo ne. Kyajinga kwepi? (Watatwile mvula wakupelako, wafwile mu...ponkapo, kyafwa.) Kechi kwajingapo kabungwe kalondela Kikye ne. Kika? Ke lukunwa Ayemwine, kechi kukekalapo jikwabo ne. Kabiji akya kipu kibena kufuma kokwa pano, kafwako kwingijila pamo ne, kafwako nangwa muntu umo ne. Kika akya? Kyafwainwa kwikala Byonkabya.

²⁵⁸ Kika kyajinga akya kipwilo kyaikajile popa? Na Kwikitundaika. Kwepi...Ng'anyi wakonsha kwingijila pamo? Kika ba Baptist, nangwa ba Presbyterian, nangwa bena Luther kyo bakonsha kutundaika kipekenyi kya lubuko lwa Bulesa? Pano inge Bukine bwaiya, kika kyubiwa? Kechi jikuzhi ne; pakuuba Bumi bufuma mu jikuzhi, ke kuya mu jipeke, ke Bumi bwa kine. Kabungwe kaimana popa, kyafwa, nobe byonka byo kyauba mu nkulo yonse, kyubatu kintu kimo. Obewa wafumine mu kyokyo, myaka fifite yapitapo, kabiji nabwelele jibiji mwi akyo! Pakuuba Bumi bwakyo bwalondela jipeke, tuji mukimye kya kumpelo, balongo.

²⁵⁹ Kika kyamukookele? Nanchi pakuba mba kikonshe kuleta awa lukunwa mukyenye kya Mwana, ke kushinkulwa awa lukunwa wa ngolonde wapya monka Mwinkambo. Kika kyangatoka kyafumyako? Nanchi, kilengela kulukukwa kwamutwe, nemipolo, amba kechi bafwainwa kwikitula konka ku j-u-b-a, bino ke M-w-a-n-a, mu kubwezha ku Mamboawama a kine, kumweshwa bintu byonse Yesu Kilishitu byo alaile mu Baibolo. Kuji Mubiji leelo mukachi ka bantu. Kabiji akwa kechi kukekala tubungwe ne, kyaya monka mujisha jabunonshi mu Laundikeya. Kika kyamwenamo awa kabungwe mukuya mubyabubile? Mamilyoni ama dola, kabiji ne mamilyoni myeo.

²⁶⁰ Kabiji Kafunga wajinga ng'anyi? Mu kupokolola balongo Banji kufuma mu buzha. Amiwa—Amiwa kechi nayuka ne; Lesa, ikalai ne atweba, tukwashai. Kutanga Kyambo! Kebakebai mu Binembelo! Mwi Abo mo mulanguluka mba mo tumwena Bumi Bwapeenape, nanchi Abo ibyo Abo bibenakunshimuna Bukine. Monai, Lesa wapaine Byambo Byanji ku kila nkulo. Ino nkulo kimye kyonse...

²⁶¹ Kika Yesu kyo aambile byo Aishile? Aye wibambijile bantu, "Anweba bakafutufutu! Anweba mwatalwa konka kukibumba, kabiji bashimika bilende byabangauzhi, kabiji anweba bashanji mwabika abo monka. Kabiji anweba mwi baana bashenu. Kabiji mingilo yo baubilepo, ne anweba mukeyuba." Kyaikalatu musango umo, balongo bami.

²⁶² Pakuuba Yesu byo akeya juba jimo, Kafunga Mukatampe wa mikoko kufuma ku Pentekositi kupita mwi Luther kupita mu mankulo onse, amba waswile akya Kyeya nobe Kibena kwiya kupichila mukyokya kyasenda, kechi kyangambwile akya

kyasenda ne, waswile Kyeya, monai, waile na kukuula, Ukeya na kukuula. Amiwa njibingi na lusekelo mambo Nayuka mba Aye ubena kwiya jibiji. Oo, anweba mwakonsha abalwa na jibumba Janji? Anweba mwakonsha kulaba nyi? Kujitu jishinda jimo ja kwikyubilamo, kechi kupita mu kipwilo ne, kana kupichila mu kusemwa mwi Aye. “Kabiji bonse Amiwa bobampa kwiba Taata, bakeya kwi Amiwa, kabiji kafwako muntu nangwa umo wiya ne kanatu Ba Taata bamwita.” Monai, abyo ibyo bitanwamo mukikye, Kwikiswa. Aye. . . Akyo kyo kyonka Bupe kya Kimishimishi kyo Nayuka, ke kya bupe kya Lesa Aye kyo apaine pantanda, Mwaanaji Yeka umo. Kabiji Aye ye umotu, keesha, leelo, ne myaka yonse, Kyambo. Mwamona? Mwamuketekela Aye mu jino juba, kuyula konse kwa Baibolo.

²⁶³ Kimye abya byafyamika sebeni. . . Kunyuma kupita mu Mankulo a Bipwilo Sebeni, kwajinga byafyamika sebeni byafiwa. Amiwa mbena kunemba buuku wa Kikye. Kabiji umo wafunda masukuulu a byambo bya lesa waambile kwi amiwa kechi papita bimye byabaya ne, mba, “Mulongo Branham. . .” Monai Satana byo akebele kwimufumyapo mu mukakwa? Aye waambile mba, “Mulongo Branham, wayuka kine kintu nyi? Naketekela mba Nkambo usa kusolola kwi anweba byo tubena kuuba kyalondelapo. Kiji ku. . . kikekala kyafyamika kikatampe kyafyamikile mu tutwe Tutetesho Tutanu na tubiji.”

²⁶⁴ Naambile namba, “Ine, akyo kechi ikyo ne, mulongo.”

²⁶⁵ Aye waambile mba, “Kikekala kintu kimo kyabula ne kunembwa mu Kyambo.”

²⁶⁶ Naambile mba, “Ine! Ine! Kechi mulubeko ne, ‘Yense ukanungako kyambo kimo, nangwa kufumyako Kyambo kimo.’” Mwamona, Kiji kala kuno, bino akya kyakupangululwa kyankakalwa mwikimona Kyokya, abo kechi banji nabumi bwalepa ne mwamona Kyokya.

²⁶⁷ Kabiji mankulo apita, tuji kuno mu Laodikeya. Kabiji vulukai, nkulo ya Laodikeya, Aye wajinga pangye ya kipwilo, na kunkokosha, na kweseka kubwela mukachi: Eva wabikile Adama wanji. Lesa, etukwashe. Twayai tuye kubushiya bwa kambi na kumutana Aye. Twayai atweba tumaname kwakubula abya bibelo ne Aye. Twayai tuye kwi Aye mu lufu Lwanji, mu kuzhikwa Kwanji, kabiji ne mu lusanguko Lwanji; mambo Aye ujitu pamo keesha, leelo, ne myaka yonse.

²⁶⁸ Twayai twimbe lwimbo umo kasa tukyangye kuya ne. Mwakonsha nyi? *Amiwa Namutemwa Aye*. Mwakonsha kwitupa kii, nyenga? Baanga bayuka lwimbo wakala? Ami. . . Inge mwakonsha kwikala mu mbung’eno, Amiwa ne kitemwa.

²⁶⁹ Pano twayai tupwishe meso etu, kilangulukaipo Yehoba. Kafwako nangwa umo wafikilamo ne, kafwako nangwa umo wakonsheshe kwikyuba ne kanatu Aye, kabiji Aye wayishile pano panshi, ne kwikala Mwaana muchече, Aye waikela nobe

Wajinga na myaka icheche, Aye waiketele ke Kapeta, Muntu ubena kwingila, Aye waiketele ke Mwanamukoko, Waiketele ke Kitapisho, Aye wasangwilwe, Yehoba. Kabiji nobe Mosesa wafumishe akwa kuboko kwanji aye monka mukwapa kufuma kumuchi wani mwine, Lesa wabwezhezhe kuboko Kwanji pa kyaji Kyanji, kyafyamika Kyanji, Mwaana Wani wapuminwe na kikola kya bubi, kechi kwizhijika ne, kabiji ne kwibuzha monka mukyanji jikwabo, kabiji pakwikufumyako ne bintu bikwabotu kwi anweba kabiji Amiwa. "Yesu Kilishitu ujitu pamo keesha, leelo, ne myaka yonse."

270 Talai pe Aye pano.

Namutemwa Aye, Namutemwa Aye
Mambo Ye mutanshi wantemwene amiwa
Kabiji wapotele lupulukilo lwami
Pa Kalvali pa kichi.

271 Baanga bayuka mba kyafwainwa kwikala kafunga, ambai mba "Amena." [Kipwilo kyaamba mba, "Amena."—Waku.] Kyafwainwa . . . Kika kafunga? Byo kyafwainwa kwikala. Pano kimye kyo tubena kwimba yuwe veeleshi umo ne jikwabo, yai ku kilang'anya pa tebulu. Kuji ba Methodist, Baptist, Lutheran, Presbyterian, Katolika, ne bonsetu, baikala muno bufuku buno. Imunai mu maboko, ne kwamba mba, "Mulunda kang'enda, Njina lusekelo pa kutanwa kuno ne anweba, bufuku buno." Ambaipo kintu kimo kwi abo. Ambai mba, "Lesu emupeshe," byo tubena kwiimuna maboko umo ne mukwabo. Byo tubena kumwimba jibiji.

Na . . . [Kafwapo bijipo pa tepu ne—Waku.]
. . . lupulukilo lwami
Pa Kalvali pa kichi.

272 Pano twayai tupwishe meso etu ne kusutula maboko etu, ne kwimba kwi Aye.

Namutemwa Aye, Namutemwa Aye
Mambo Ye mutanshi wantemwene
Kabiji wapotele lupulukilo lwami
Pa Kalvali pa kichi.

273 Kabiji pano, Lesa kwakubula musango ne. Nanchi, twayai tukunyike mitwe yetu ne ku munyinyizha, nobe baana babacheche, anweba mwi baana bakwa Lesa. Kechi mutale pakyokya kyakonsha kulanguluka ntanda ne, anweba mubena kupopwela pano, kupopwela Kilishitu. Kunyikai mitwe yenu ne ku munyinyita. [Mulongo Branham wanyinyita *Namutemwa Aye*—Waku.]

274 Bushe nanchi anweba bonse kechi muvwapo kyakukatazhiwa nobe byobya nenyi? Kijitu nobe kyaumusango ao Wakintu kimo kyakashiwa na byonse byaluzhinauko kabiji ne ntanda yafuma kala mwi anweba? Kuvwa muyewa musango? Suntulaiko maboko enu, "Amiwa naumvwa kuchinisha.

Naumvwa kyapusanako. Naumvwa nobe Mbena kuja kufuma mu maboko Anji. Amiwa njina..." Nobe mulongo kukwe lushimuno lwa, "Kanjo, Kanjo ka Kafunga, Kanjo ka mikoko." Akyo kyo Kyambo.

²⁷⁵ Lesa mikoko yanji ija Kanjo Kanji, "Muntu kechi ukekela ku kajo konka ne, kana kupichila mu Kyambo kyonse kifuma mukanwa kakwa Lesa." Kabiji akye byo Ikya, Baibolo. Atweba tujishatu pa Kyambo kyonse, kechi Byambo bikwabo ne, kana Kyambo kyonse kifumatu. Oo, kechi kyonsha kukulengela ku mutemwa Aye ne? Kulanguluka mba pano tuji na Bumi Bwapeenape! Kechi twafwainwa kwikala ne, *pano* atweba twi baana bakwa Lesa. Kechi twafwainwa kwikala, ponkapano ne! Kabiji kibena kwikala pamo mu bifulo bya mwiulu *mwi* Kilishitu Yesu. Kabiji ne televizhonyi mukatampe, amba kuji mawavu akwa nangwatu mawevu alenga bantu (muntu wenda kuzhokoloka kyalo) wayukanyikwa kupichila—mu sikilini wa televizhonyi. Akyo Kyambo kikatampe kya Lesa, kabiji ne Mupashi wakwa Lesa kutola Kyambo kya Lesa, kimweshwa Yesu Kilishitu mu bifulo bya mwiulu ku mikoko Yanji, amba Aye ye umotu keesha, leelo, ne myaka yonse. Bushe Aye kechi wawama nenyi? Wakukumya! Lesa emupeshe.

²⁷⁶ Pano twayai twimaneko pakakimye kecheche. Anweba mujipo naubena kukeba kutambula mapesho nyi mukupezhako? Pano, vulukai, mu kimye kya Kimishimishi, popwelai Nkambo Yesu. Kumupopwela Aye mu Bulume bwa lusanguko Lwanji. Kabiji inge Nakonsha kwimutokesha pa muchima, anweba, kafunga wenu, kipwilo kyenu, nangwa kintu kiji kyonse, bufuku kechi bwafichishatu ne, vula kechi iponena apa pakosane.

²⁷⁷ Bufuku bukwabo (kuji inetu waimana papo) Najinga naswikwa bingi, watolele wabela ne konto poso... Akwa kwajinga nsongwakazhi wa myaka eiti-nobe bibye ao wataile milanguluko yanji, kabiji aye wajinga... walangulukilenga nobe uji na mwaana nangwa kintu kimo, aye wajinga wafuma mu milanguluko yanji. Kabiji Billy, kufuma ku ofweshi, wangichile, waambile mba, "Taata, wakonsha nyi?"

²⁷⁸ Naambile mba, "Amiwa kechi nakonsha pano ne. Muji bantu... Amiwa kuuba ne kyuba ne."

²⁷⁹ Aye waambile mba, "Taata, kuya ku milombelo nyi? Amiwa nkebabula mba mubena kulomba."

²⁸⁰ Naambile mba, "Ee." Kabiji pa kyonka kya kimye kyo abwelele mu buntutulu bwanji. Aye waponejile mutulo, pakubuka wabukile namilanguluko yanji yalumbuluka; wajile bingi waikuta, kajo kamulaijilo nanzolo, mumilanguluo yanji yabuntutulu. Muntu waimene papo nakupana lushimuno paka kimye kacheche kapitapo.

²⁸¹ Mulongo Mack, Namumwene kuno kimye kyapita kunyuma, kuntu kumo mu kipwilo. Aye uji muno, umo wamubatufunga,

kafunga wapano. Ke mulongwa wawama bingi, kabiji Amiwa kimye kyonse namutenwa Mulongo Mack mambo Amiwa najinga mutanshi kutatula uno mwingilo. Kabiji nanchi Amiwa ponasambakene nanji. . .

²⁸² Kabiji Najinga ku British Columbia; kabiji ne kwimumweshwa amba Lesa usa kwingila bintu byonse bulongo. Amiwa najinga wikasa ne kala pa mbili, kabiji nabwelelenga monka mungyetu ako ko Natangijile jibumba jonse ja bena India kwi Lesa; kabiji bonse baalulukile, kabiji batambwile Yesu.

²⁸³ Kabiji kupichila mubungauzhi kyabujilwe nsongwalume mwina India amba wataile mwana wambile wanji, papita ne myaka ibiji, kyabujilwe kwi aye akwa koakonsha kumutana, nangwa kyakonsha kwikala byepi kwalepa, nangwa kwakonsha kwikala awa mwana wambile koaimana. Bainanji bafwilenga na kikola kya muchima. Aye wabukilwe ne kupuluka. Kabiji awe nsongwalume, wiyatu na kwikimona, kabiji byo ayukile mba aye. . . mbili wanji watainwe monka mo aambijile, ne bintu byonse.

²⁸⁴ Kechi pajipo Kyambo kimo Nkambo kyo aambapo. . . Amiwa nsakwipuzha uji yense, "Bushe Aye. . . anweba mwaumvwapo Aye mba ambepo kintu kimo, amba Aye wakimbulapo amiwa kwimubula anweba, bino kiya nakufikizhiwa monka mokyaila nyi?" Inge abyo ibyo, ambai mba "Amena." [Kipwilo kyaamba mba, "Amena."—Waku.] Mwamona? Mwamona? Byokiji, kechi Kyakakalwapo nangwa kimye kimo ne.

²⁸⁵ Kabiji Mulongo Mack walajilenga ponka pamwanya walufu, kabiji kyamwekele amba mukazhanji waichile Billy. . . mwaana wamukazhami, kabiji wabujile. . . waipwizhe Amiwa konajinga; awa mutemwika mucheche nsongwakazhi ne. . . mwina kwanji. Kabiji aye. . . Kabiji muko-wami-wa mukazhi waambile mba, "Uji kwalepa ku norten British Columbia pa lwendo lwa kwipaya nyama."

²⁸⁶ Kabiji alwa lukeelo, mu musango umo, Amiwa—Amiwa—Amiwa kechi nakonsha kwendesha yewa mbili ne. Kabiji pano Billy waambile mba, "Naketekela mba Amiwa sakukwita kuya kunzubo kimye kimo." Kabiji aye waile kokwa nakwita. Kabiji kuno abo kobaishilenga nakunyema lubilo, kimye awa mucheche mwina India waimene papo, awa mucheche. . . kika akya kyajinga nakana kambili, kabiji waambile mba, "Mulongo Mack walala ponka pamwanya walufu, kabiji ubena kwimwita anweba."

²⁸⁷ Kabiji Nalupukilemo, naile mungye ne kufukama panshi. Naambile mba, "Mutemwe Lesa, kuya kokwa, fili sauzande mailoshi kukilang'anya kyaalo, mu juba jasama akwa ku Arizona, ku Tucson, ye mulongo wami, kabiji aye walala kufika pa kipimo kya lufu. Mwakonsha kumukwasha nyi?"

²⁸⁸ Kwajingatu Kintu kimo kyaambile kwi amiwa, “Kijitu bulongo.”

²⁸⁹ Kabiji byo Naile kwi Mulongo Mack juba jikwabo, na kwamba kwi aye, kabiji Namwipwizhe mba, “Ng’anyi kimye kyamwekele kikye?” kyajingatu kyonkakya kimye kimo kyotwaile mumilombelo.

²⁹⁰ Oo, Aye. . . Bushe Aye kechi wawama nenyi? Aye ujitu pamo keesha, leelo, ne myaka yonse. Amiwa njibingi na lusekelo pa kuyuka mba Amiwa ngikala mu Kyeenyi kya Mfumu.

²⁹¹ Twayai tukunyike mitwe yetu pano, kabiji mulongo wawama mucheche uji muno, mulongo mishonale, mulunda nami, membala wa ba Assemblies of God, mulongo wawama kuno. Namutela mba, “Creechy.” Aye waambile bintu byawama. Mulongo Creech, Nakutela byobyo. Amiwa kechi nayuka bya kwamba ne, obewa wi mulongo wami ne kalume wakwa Yesu Kilishitu mu jino juba japelako. Lekai Lesa emupeshe. Kabiji Nalanguluka mba Mulongo Tony waambile mba usa kupalang’anya jibumba pa kino kimye, kimye kyo twakunyika mitwe yetu. Kijitu bulongo, iyai. 

64-1221 Kika Kyafwainwa Kwikala Kafunga
Ramada Inn
Tucson, Arizona U.S.A.

KAONDE

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaana, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org